

東  
華  
續  
錄

東華續錄

咸豐十一

臣王先謙敬編

臣陶濬宣恭校

九月癸丑朔以戶工兩局銅斤短絀申諭飛催銅運○以查辦番  
案草率拔署陝甘總督薩迎阿花翎○乙卯諭軍機大臣等寄諭  
欽差大臣大學士賽尚阿廣西巡撫鄒鳴鶴程裔采奏遵查湖南  
會匪見獲多名究出頭目等語據稱衡陽清泉兩縣訪獲匪徒謝  
發祥夏紹銀熊仁和三名究獲頭目左家發並獲蕭二等犯起獲  
旗幟及木印令籤陣圖書信偽照各物據左家發供聽從廣東人  
李丹入會見接李丹自廣西來信屬令糾人派伊爲衡州總管各  
等情李丹係由廣西致信左家發是該匪見在西省已有端倪此  
時鼠匿何處夥黨若干如何勾通衡州齋匪亟應嚴查剿捕盡絕

根株又據左家發供聽從李丹入會以廣東老萬山卽狗頭山之朱九濤爲會首朱九濤自稱太平王李丹稱平地王張添佐稱徐光王令其用印寫有老萬山三字等語前據寶尙阿奏獲犯供詞有太平王坐轎進永安州城之語是否卽係朱九濤抑係韋政並洪秀泉是否卽係狗頭山朱九濤之匪黨俱著確查具奏再達洪阿諒已啟程來京巴清德見在梧州養病計當痊癒永安攻勦情形見在如何張敬修前次遣散壯勇是否安靜回籍不至滋事顏品瑤雖經就戮其弟顏三及其夥黨竄擾何處仍應乘勢殲滅毋令賊勢復熾又前據單開容縣梁二十大興業縣黃亞佐等賓州麥二邱二妓各股匪俱多至二千餘人其餘股匪亦復不少著卽嚴飭該處文武併力堵截殲厥渠魁解散黨與是爲至要所調各省之兵何省最爲得力何省疲弱一併具奏程喬采奏片著鈔給

閱看將此由五百里諭令知之○諭程喬采馳奏訪獲會匪訊究各情等語湖南衡州地方齋匪最多經該知府陶恩培訪獲謝發祥等犯究獲頭目左家發並於獲犯蕭二家起獲旗幟黃布馬褂號衣木印令籤陣圖書信偽照多件提訊左家發據供係聽從廣東人李丹入會以廣東老萬山卽狗頭山之朱九濤爲會首又有張添佐改名赤松子在湖北湖南各處藉名賣藥暗行勾結朱九濤自稱太平王李丹稱平地王張添佐稱徐光王朱九濤約令該犯糾結匪徒等語該犯等行蹤詭祕游奕於楚粵之交若不協力訪拏勢必滋蔓愈甚著徐廣縉葉名琛查明老萬山坐落何處是否卽係狗頭山該匪等係何會名夥黨若干分隸何處務卽嚴密訪查派委員弁將頭目朱九濤及匪黨全行弋獲並搆其巢穴毋得稍畱餘孽其在湖北湖南勾結各匪著程喬采等就見獲各犯

究其黨與詰其住址密飭兩省州縣不動聲色一體訪拏毋令一名漏網原片著鈔給徐廣縉葉名琛龔裕閱看將此由五百里各諭令知之○安徽巡撫蔣文慶奏續獲首犯程六麻孜並搜獲夥黨多名見仍飭屬訪拏如再能多獲巨犯當擇尤酌保得旨若能全行弋獲方准奏請加恩識之○丙辰諭軍機大臣等昨面諭定郡王載銓工部右侍郎彭蘊章內務府大臣基溥相度萬年吉地聞陸應穀於地理之學素所講求本日已明降諭旨令該撫來京陛見陸應穀接奉此旨交卸後卽行來京協同載銓等詳細相度並著延訪江西紳民中精曉堪輿者一二人帶同進京以資商酌將此諭令知之○召陸應穀來京以王植署江西巡撫

由刑部左侍郎署

○戊午諭內閣前因南河豐北廳屬漫口當降旨令瑞常於試差回京之便馳往該處查勘茲據查明具奏漫口丈數及被淹地方

情形與該督等原奏大略相符回空漕船據查亦不至有阻滯見在大工正當購料興辦之時著陸建瀛楊以增遵照疊次諭旨妥速籌辦並隨時咨會顏以燠陳慶偕務將漫水宣洩清出運道俾回空漕船暢行無誤其被水居民既據查明情形輕重不等仍著江蘇山東各督撫加意撫恤毋令失所○己未盛京將軍奕興等奏謹遵吉期恭請 福陵 神牌還御安奉禮成得旨敬悉○庚申賽尙阿奏據布政使勞崇光稟八月二十九日署橫州知州黃輔相探得麥二匪黨千數百人由貴縣三里墟竄住站墟練眾堵禦互相殺傷該署州調集團練於閏八月初一日馳抵謝墟探得該匪已竄至南岸村隨飭團練堵截該匪開礮轟擊勢甚猖獗各村團到齊進戰殲斃執旗賊一名騎馬賊先鋒一名賊夥二十餘人初二日進攻該匪負嵎不出該署州調博合墟一帶團練五千

餘人以圍南岸調謝墟站墟團練二千餘人駐紮北岸調周璞古  
平中屯等村團練二千餘人堵截龍門塘又諭那陽市黎村塘各  
團堵截上游該署州之子黃韶年管帶壯丁百名幫同練眾堵截  
南岸村後小路初三日分三路攻剿又派壯丁二百名駕船在龍  
門塘及劉公墟一帶堵守並用大纜於河灘攔截以防兔脫初四  
日直進大灘駐紮逼近賊巢每路先縱火牛四頭衝入賊陣匪不  
能開礮我軍乘風噴放花筒火勢猛烈賊不敢出練壯奮勇直前  
搶獲賊礮向村內轟擊並四面放火該匪情急紛紛鼠竄北岸槍  
礮齊施該匪駛駕大船三隻欲逃每船約六七十人當於灘頭擊  
翻二隻賊首麥二之船駛至中屯河口被大纜牽挂橫互灘上該  
處亂石森立灘水甚緊賊船不能竄過軍船亦不得前該署州趕  
到川大礮轟擊斃賊二十餘人餘匪情急投水俱於下流撈獲據

獲賊認供內有賊首余亞源大當割首級梟示賊首麥二抱大槩  
漂流而下經練勇槍戳溺死又首匪麥亞銳同夥犯數人由小路  
逃至大塘村山坳經黃韶年帶壯丁生擒並獲夥匪三名初七日  
撈獲麥二屍身割取首級梟示是役計獲首級四百五十九顆生  
擒四百一十七名燒斃溺斃共約千人首夥各犯悉數殲擒奪獲  
刀矛器械大小礮位油米等物無數又賊首邱二嫂於八月間由  
麥二股內分夥千餘人自來賓石牙墟至貴縣本樞墟府經歷楊  
潤等帶壯練數百人進剿該匪負隅不出因賊眾兵單添調北山  
里練丁二千餘名會剿並先期知會來武各縣堵截閏八月初十  
十一等日探報匪黨已至石龍墟盤踞該縣知縣張汝瀛督壯練  
於牛窩嶺駐紮派團練二百名分爲兩隊暗紮王村又派四百名  
分爲四隊前後設伏選練丁前往誘敵該匪持械突出接仗練丁



且戰且還殲斃賊十餘人該匪蠡擁前撲伏兵齊發斃賊數十人奪獲刀矛百餘件該匪敗退各路壯練乘勝奮擊斃賊百四十餘人餘匪閉柵暗放槍礮傷練丁數人我軍開放大礮破柵進墟斃賊百數十人生擒八十四人奪獲礮械百餘件餘匪逃竄武宣縣屬之東畹梧山一帶該縣督壯練越境窮追適五山汛守備吳成榮帶兵馳至十二日至梧山村適署武宣縣知縣翟松在於交界防堵派練勇趕到協同攻擊殺斃騎馬賊渠邱二嫂割取首級通計先後各路斃匪六百餘人生擒二百七十餘名連日搜捕餘匪以期淨絕根株所有尤爲出力之署橫州知州升補知府黃輔相請賞戴花翎署貴縣知縣張汝瀛請交部議敘以示鼓勵其餘在事文武員並紳團人等應飭查明保獎 上諭內閣此次勞崇光督飭員弁率領團練多方布置不藉一兵之力將積惡首匪麥二

殲斃並將股匪一千七百餘人勦擒淨盡其邱二妓一股亦經兵壯將首夥殲擒餘孽即可殄滅勞崇光調度合宜深堪嘉獎署橫州知州升補鎮安府知府黃輔相出奇制勝有膽有識著賞戴花翎署貴縣知縣張汝瀛素得輿情勦賊出力著交部議敘在事文武員弁紳士團練人等均著查明保奏○賚尙阿奏據烏蘭泰稟報約會總兵李能臣劉長清於閏八月二十日一同進攻水寶逆匪十九日派秦定三穆騰額田學韜色欽額戴文蘭等各帶兵在獨水嶺龍虎嶺等處埋伏常祿開隆阿等帶兵分路接應經文岱江忠源和福嚴守各營仍備接應隨卽銜枚前進二十日至石燕嶺我軍離賊營不及一里該匪用大礮連轟復於南頭營內擁出賊匪六七百名我兵用檣槍火箭分路迎擊忽莫家村賊繞來二股常祿之兵由山上壓下用連環槍轟擊該匪奔走南行北面二

寨之賊一齊擁出被我兵擊敗該匪入寨不及向東南逃竄其接應之賊拌死直撲我兵常祿清長一由山上壓擊一由山腰截剿該匪死鬪未能合一其二寨之賊俱竄南面二大營內穆騰額田學韜極力督攻烏蘭泰飛令兵丁緊逼營牆該匪槍礮不能施放眾兵一齊拋擲火器屯官思達朋首先帶兵爬牆而上該匪用礮子木石擲打我兵拌死擁入賊營北門早被堵住南門逃匪亦被截擊營內賊匪約六七百名盡行殺斃按獲槍礮旗幟器械多件其輜重及板房帳房三百餘架悉行燒燬當我兵攻營時東南山頭之賊撲來救應經清長等擊敗退回其北面大股賊匪攻撲圍嶺經開隆阿擊退乘勝追剿復有莫家村賊七八百名前來接應水竇經慶福之兵迎頭截擊烏蘭泰率常祿帶滇兵接應賊匪已敗秦定三兵幫同追剿將衛龍村乘便燒燬時西北煙火四起並

有礮聲知劉長清等兵到經文岱江忠源亦帶兵趕至圍嶺烏蘭泰隨飛調清長等兵攔截水寶之賊其餘齊來攻城該匪復出營來追經我兵奮力擊敗時莫家村等處之賊退入寨壘施放槍礮各路俱有礮臺我兵奮攻一時之久未能得力時已申刻子藥火繩殆盡當卽收兵回營又據總兵劉長清李能臣稟報二十日帶同川滇兵勇由龍眼潭前進該處山險路狹山下均係水田北勞六廟竹枝等處均有賊盤踞當卽督兵分路進攻轟擊賊匪延燒村莊直衝至西門外西河村該匪先於山嶺安礮設卡阻截施放大礮兵勇奮力逼近卡門該匪死關官兵連放槍礮斃賊數十名生擒三名臣查水寶莫家村皆賊之精銳所在烏蘭泰雖四次獲勝而兵力太單無夾攻接應之軍卽使破其水寶亦不能分兵以守巴清德前赴梧州養病茲聞已愈趕赴昭平向榮因病由水路

已於二十日至昭平日內卽當拔營前進其所帶之兵原係交總兵長瑞李伏先期統帶疊經臣嚴札一面畱防昭平一面分兵進攻永安乃遲遲不應未能刻速進攻幸烏蘭泰獨力維持屢挫兇敵此次攻營首先突入之屯官思達朋打仗奮勇之總兵經文岱游擊穆騰阿都司田學韜應先行請旨獎勵仍令烏蘭泰查明此外出力員弁酌保巴清德向榮自官村挫敗遲至一月始抵昭平惟因病遷延稍有可原總兵長瑞李伏既至昭平去永安一百餘里乃因鍋帳未齊耽延不進應請旨交部嚴加議處仍畱營差委以責後效見在兵力多有疲乏前經臣咨行廣東巡撫再募潮勇三千名以資剿捕嗣准咨復已先募潮勇千名飭令潮州府同知甯立悌卽行督帶起程其餘二千名見由臣札飭潯州府知府張其瀚前往迎提並札令署道員張敬修就近募勇千餘名統歸烏

蘭泰一路會合攻剿近據探報逆匪於濛江一帶備有船隻誠恐官兵一律到齊該匪復有竄越已密飭藤縣知縣張鵬萬招募前次得勝團練密爲分布不動聲色夾江以待復密飭劉繼祖帶領張釗水勇潛伏濛江中流遇有竄匪卽行截擊臣見派臬司姚瑩持令前赴荔浦卽可就近與諸將參酌辦理復派候補總兵長壽督帶兵勇五百名前赴平樂防堵以昭嚴密上諭軍機大臣等該匪竄踞永安以水竄莫村爲前路門戶經烏蘭泰督帶將弁分路進攻四次獲勝先將水竄攻破賊鋒大挫惟莫村餘匪未淨永安州城逆首尙未擒獲我軍乘勝圍攻是否兵力不至過單見經張敬修就近募勇千餘名歸烏蘭泰一路會合攻剿著隨時察看情形調度接應務出萬全並嚴飭巴清德向榮趕緊帶兵前赴永安協剿毋得再有遷延坐失事機該匪於濛江一帶備有船隻希

圖竄越逆首洪秀泉是否仍在其內該大臣已密飭張鵬萬劉繼祖等分帶練勇潛伏以待並派姚瑩長壽分赴荔浦平樂等處相機防堵斷不可令該匪等乘閒竄逸追捕又費周章再永安州距省甚近匪眾盤踞州城內外難保不分股窺伺見在湖南續調之兵想已趕到務須加意嚴防妥爲布置毋得稍有疏虞將此由六百里諭令知之○以攻勦水竄獲勝賞屯官副將銜巴圖魯思達朋總兵銜開復總兵經文岱嚴議處分餘升敘有差總兵長瑞李伏以耽延不進下部嚴議○予廣西陣亡從九品周大勳祭葬世職○辛酉諭內閣近來東南兩河工次每有過往官員及舉貢生監幕友人等往求資助河工各員或礙於情面或恐其挾制往往那動公項以爲應酬之費積習相沿久滋流弊道光二十四年會奉諭旨嚴行禁止近聞此風雖較前稍息而遊客之請求河員

之濫費仍不能免試思河工銀兩國帑攸關多一分應酬卽減一分工料勢必侵吞剝削貽誤要需於河務大有關係必當嚴行申禁力挽頽風嗣後官員士子等各宜自愛不准前赴河工河員果能廉正自持又何難概行拒絕儻有無賴之徒敢於挾制或投遞書函公行請託經該河督查出卽將其行李扣留指名嚴參懲究如河員剋減工程濫施邀譽一併嚴參懲辦以除陋習而慎河防將此通諭知之○諭軍機大臣等據陳世忠奏山東洋面盜匪年增一年今歲尤甚請前赴粵洋跟蹤緝捕等語據稱盜船初旋亟應追剿惟東省兵船兩無不能前往請飭閩省水師將遊巡幫船酌齊弁兵軍火礮械分派將備管領統交陳世忠帶赴粵洋會同粵省兵船連幫剿捕以期掃穴殲渠等語水師巡洋捕盜固當不分畛域協力夾攻而本省洋面職分攸關亦須兼權熟計若如陳



世忠所奏統率閩船前赴粵海則登州洋面該總兵轉有鞭長莫及之勢設有不靖伊誰之責既稱東省兵船兩無則由東赴閩該總兵應用何船應帶何兵亦未籌及事關海防要務該總兵自應與該撫籌計萬全以昭慎重著陳慶偕接奉此旨將陳世忠所奏各情悉心商榷以目下情形而論是否陳世忠可以遠赴閩粵於剿捕機宜確有把握其登州鎮又應派何人暫署是否不至顧此失彼著該撫等妥籌會議迅速具奏陳世忠所陳水師情形摺片等件已寄諭沿海各督撫查辦矣將此諭令知之○諭前因山東洋面盜匪占駕官船南竄降旨令陳慶偕督飭水師將弁追剿並飭沿海各督撫一體兜拏本日據登州鎮總兵陳世忠遞陳水師情形該省洋面遼闊水師兵弁無多成造船隻既須遠資閩粵而駕駛風濤又非猝能教習該總兵請飭江浙兩省仿照閩省遊巡

之例各營酌撥大船一隻酌足弁兵軍火選派精幹將領管帶會合連艘專司截捕並自請前赴閩浙粵洋跟蹤追緝朕思閩省遊巡兵船如能前赴粵洋追捕山東竄回盜匪卽由閩省水師提鎮中帶兵往剿較之陳世忠由東赴閩更爲直捷著沿海各督撫等各就該省洋面情形悉心籌畫迅速具奏該總兵又稱盜船由粵閩入浙界歷江省洋面以至東洋山西賊盤均有必經處所並著該督撫嚴飭將弁實力梭巡如果認真堵緝該匪等何至直抵登州肆行劫搶從容南去如入無人之境乎前據常大涇陳慶偕節次奏稱該匪等係廣東福建浙江等處人而銷贓聚會在澳門香港與石浦溫州又有在普陀山打醮情事是盜匪淵藪確有可據趁此冬令賊匪飽颺之後出其不意各省調集舟師擒穴擒渠亦不可失之機會也該總兵原摺片二件均著鈔給閱看將此各諭

令知之○壬戌諭內閣徐廣縉葉名琛奏圍剿逆匪獲勝一摺逆匪凌十八屯聚羅境地方踞險固守經該督等調集官兵招募莞勇隨同進剿賊勢大潰該匪等恃險負隅爲日已久茲既疊受懲創不難埽穴擒渠著徐廣縉等督飭將弁兵勇乘勝進攻迅將首匪擒獲毋令竄逸○諭軍機大臣等前因廣西新墟逆匪分竄降旨飭令徐廣縉等嚴守肇慶等處本日據奏水陸嚴防見辦情形並如數撥解廣西軍餉等語逆匪竄擾永安州城尙未克復昨據賽尙阿奏見探該匪復於濠江一帶備有船隻恐官兵一律到齊又思竄越東下肇慶各屬爲東西兩省孔道最爲喫重該督等已添派員弁督帶兵勇馳往交界處所著嚴飭認真防堵斷不可任其竄入至藤縣距信宜不遠見在凌十八梁二十大等股尙未撲滅該匪與廣西韋政等皆係會匪結爲死黨恐韋政等被剿窮蹙

南竄信宜合夥必應於沿江一帶扼要堵截勿任勾連糾結轉致蔓延再該督見駐高州辦理凌十八等股匪屢獲勝仗計可指日剿除一俟此股辦竣卽酌量移駐兩省扼要地方合力堵剿聲勢更爲聯絡諒該督等已籌及此也將此由四百里諭令知之○癸亥戶部奏上年奏准暫開捐例擬請行文各省遵照辦理謹先酌議辦法二條一厯屆奏開事例捐生赴部報捐零費甚爲繁重應請將歸公飯銀照費並四分平餘具呈領照諸費概行裁撤一外省捐輸章程有加無已所捐銀數動用並不報銷無從稽覈此次擬開事例係在部庫交銀應將外省捐輸一律停止從之○撥山東司庫銀十萬兩備濟甯等處賑需○免廣東節年民欠地丁米及買秧資本銀○乙丑季芝昌因病賞假以裕瑞兼署閩浙總督

福州慶端暫護福建巡撫

布政使

○丙寅諭內閣陸建瀛奏恭刊

御纂性理精義 聖諭廣訓直解裝潢進呈並將見在宣講章程  
開單具奏該督所進之書刊刻甚好已畱覽矣單開各條朕詳加  
披閱所稱資成教官慎選樸實生員每日赴鄉宣講藉可驗對保  
甲戶口並令地方官於因公赴鄉隨時獎勸教官課士書院授徒  
均令加試性理論一道並將 欽定四言韻文頒給各州縣令塾  
師詳細講解以正蒙始所擬均屬可行著卽飭屬認真遵辦毋得  
始勤終怠視爲具文至該督所轄三省各營見擬頒給 聖諭廣  
訓直解一部惟在該管將備隨時講解使兵丁等明曉大義有勇  
知方自未便以書塾條規施之營伍該督所稱操演事畢宣講之  
處執謬難行著毋庸議○諭陸建瀛奏勸捐鄉穀以儲民食等語  
江蘇省頻遭水患閭閻拮据經該督飭屬勸捐鄉穀兩月以來據  
上元縣鄉捐穀三萬二千石江甯縣鄉捐穀二萬七千石已屬辦

有成效著該督卽飭各屬按照所定章程廣爲勸導實力奉行毋得日久生懈義倉之設係由民間公正紳耆自收自放不涉官吏之手無抑勒侵蝕等弊最爲善政朕軫念民艱時縈懷抱封疆大吏均有父母斯民之責果能豫籌本計圖匱於豐使官民之心上下相信則賑恤義舉吾民自必樂從較之歉歲始議捐輸更有裨益著各省督撫各就地方情形詳細體察妥爲辦理用副朕意○庚午賽尙阿奏永安州城爲賊竄踞一月有餘各路大兵未能會合雖烏蘭泰一軍連獲勝仗而兵力太單萬難責其收復城池殲擒渠首總兵李能臣劉長清進紮古排尤當時顧蒞浦之新墟隘口且兵數亦復無多故僅與犄角相持不能輕進專俟巴清德向榮兵勇到齊方敷策遣乃該都統提督自官村挫折後在平南頓兵旬餘猶未拔營起程及抵昭平又不迅速前進屢經臣嚴催曲

諭總以山深徑窄爲詞又各因病折轉梧州往返遲延至九月初三日始繞抵平樂猶幸賊匪未竄方冀其催兵前進剋日奏功乃據向榮函稱病勢增劇清微二十日卽由平樂趕赴省城等語該提督爲本省統兵大員卽抱恙未痊何得擅離營壘乃當萬分喫緊之際竟將兵弁交與巴清德驟行回省實出情理之外應請旨將向榮先行革職責令隨營效力巴清德遷延日久始到永安亦應請旨交部嚴加議處仍畱營帶兵以觀後效所有提督印務札委總兵劉長清暫行護理仍乞迅賜簡放以重軍務署古州鎮總兵李瑞自黃茅界拔營由龍寮嶺翻山行抵永安屬之古東村紮營未定被賊劫營鍋帳等項全失傷亡弁兵多名退回昭平不復前進似此恇怯失機應卽請旨革職拏問治罪見偵探各賊首均在永安城及水竇莫村等處又於各隘口均築礮臺空斷路徑冀

圖拒守巴清德率同總兵李瑞已抵荔浦之新墟臣授以機宜令

其會同劉長清等會約烏蘭泰分路策應李瑞所帶之兵暫令嚴

守昭平遏其東竄復於臨桂附近各團挑選精壯二千名又募壯

勇五百名並京營弁兵二百名新調湖南兵一千名湖北兵五百

名配帶礮位

臣

卽於拜摺後帶同前赴陽朔駐紮督令各路會合

剋期攻勦陽朔距永安旣近且爲省南門戶旣易督戰亦可保衛

省城庶聲勢較爲聯絡

上諭內閣賽尙阿奏出省督剿逆匪並

特參因病誘卸之提督遇敵怯退之署鎮及進兵遲延之都統一

摺廣西大股逆匪竄踞永安州城一月有餘烏蘭泰雖屢獲勝仗

仍須巴清德向榮督兵會合策應乃該都統提督前因官村挫失

頓兵平南月餘始抵昭平經該大臣屢催前進仍各稱病折回梧

州往返耽延至九月初三日始繞抵平樂永安急須圍攻收復而



督兵大員似此諉卸延誤實出情理之外向榮久歷戎行豈竟不知緩急輕重前此雙髻山風門坳之捷皆能身先士卒累奏奇功朕方冀其努力滅賊克膺懋賞乃於萬分喫緊之時自稱病勢增劇將兵弁交與巴清德遞行回省身任本省提督擅離營壘設有疏虞咎將誰屬自問於心安乎否乎向榮著卽革職仍責令隨營效力廣西提督朕不遽行簡放著劉長清暫行署理向榮果能知感知懼奮勉出力尙不難再承恩眷若竟意存諉卸甘棄前功自速後禍朕亦不能曲加寬宥也至巴清德以都統大員督帶重兵亦復屢次託病任意遷延與向榮厥罪惟均著一併革職畱營自效署古州鎮總兵李瑞前在古城堵守縱賊竄出今復於永安所屬之古東村地方被賊撲營傷亡弁兵多名退回昭平不復前進實屬恒怯無能著卽革職拏問治罪以示懲儆左江鎮總兵著惠

慶調補該大臣見已出省馳赴陽朔一帶親督各路帶兵大員併力進剿務將永安州城卽日攻克著名首匪悉數殲擒勿令竄逸致干重咎懍之勉之○諭軍機大臣等賽尙阿奏參都統提督總兵及督師出省前進日期一摺向榮久歷戎行素稱驍勇自湖南移鎮廣西屢獲勝仗前此雙髻山風門坳之捷皆能身先士卒疊奏奇功何至官村一挫之後與前判若兩人該員爲本省提督剿賊是其專責卽有疾病亦當力圖進取以贖前愆何遽藉詞諉卸輒行回省是否與巴清德意見不合其赴省面見該大臣有無稟訴之詞巴清德向榮又何以藉病遷延兩人如出一轍著賽尙阿詳細訪查並將前次雙髻山風門坳兩捷巴清德與向榮究係何人首先奮勇奪隘先登官村之敗是否兩人互相推諉以致失機一併確查具奏該大臣仍當酌量兩人材識優劣用其所長如不

能同心合力卽令各領一軍責以自效勝則立予敘勳敗則嚴行治罪功罪分明該員等便無所用其推諉想該員等奉到前降硃諭亦當知感知奮也諸賊首萃集永安正如釜底遊魂不難併力殲斃況賊心離貳有機可圖我軍又各路堵截圍而該大臣見旣進駐陽朔卽當激勵諸將迅督兵勇立埽妖氛萬不可再事稽遲致該匪乘閒突圍竄擾他處並須嚴密訓誡各營無得稍洩軍情致匪黨得以探聽消息如土匪范連得等尤當設法偵獲所有雲南都司施嘉祥卽著該大臣飛調赴營差委前調之邵鶴齡董光甲胡定國已先後帶兵赴粵矣將此由六百里諭令知之○賽尙阿奏各路進兵情形得旨汝旣出省督剿誓必攻破永安全數殲戮或追剿盡淨亦可若再稍有挫折朕必惟汝是問○安徽巡撫蔣霽遠奏遵查角子山係泌陽西平遂平確山舞陽裕州六州縣

所轄犬牙交錯山徑叢雜素爲匪徒出沒之區近年搶掠案件有當時獲犯者有控案後州縣前往查拏而匪徒先已遠遁旋復乘閒潛入者雖無一日搶掠十數家之事然一人先後搶掠十數案在所不免泌陽毗連青台鎮地方係偏僻小路較之南陽府大路可近數十里商賈鈔近由此行走向未設有墩鋪匪徒乘閒竊劫行旅因有戒心經臣添設窩鋪卡房選派兵役委員梭巡以資保衛又唐縣匪徒欲行圍城一節若果聚集千餘人斷難掩人耳目密加查訪實無其事至州縣辦理案件意存避就化大爲小積習相沿實堪痛恨臣已嚴禁除仍明查暗訪外如蹈故轍立即嚴參伏思豫省南汝光三屬匪徒結捻多係無賴窮黎或數人一捻或二三十人一捻聚則爲匪散則爲民其兇黠之徒每自稱爲首恃其強橫恐嚇良民捻首雖多並無爲眾所推服者往往勾結聚集

勒索得贖卽各星散此外歸德陳州二府與安徽鳳陽潁州山東曹州江蘇徐州等處接壤雖無捻匪之名每有棍徒滋擾見在豐北漫口距歸德百數十里難保無匪徒藉災滋事已嚴飭各地方官不分畛域認真巡緝見在首犯喬建德雖已弋獲其夥匪必須一一究出悉數就擒臣已通飭各地方官實力搜捕不但喬建德案內餘匪應按名嚴緝凡有結夥糾毆之事卽屬匪徒結捻之漸乘其尙未恣肆隨時隨地密訪查拏免致釀成巨案 上諭督飭所屬認真妥速辦理勿被蒙混○辛未諭內閣軍機大臣會同戶部議奏奕山等會議新疆兵屯章程一摺新疆換防兵丁前據御史張廷瑞奏稱多有倩人代替老弱充數者邊陲重地彈壓撫綏全資兵力若任令老弱游民冒濫充數於操防控制尙安望其得力著陝甘總督烏魯木齊都統於每屆換防之時務須挑選年力

強壯弓馬嫻熟兵丁前往更替如查有冒名代充立即從嚴懲辦以肅營制而重邊防○諭軍機大臣等有人奏廣東新安縣屬沙井之孔進鄉陳姓聚族而居兇悍不法見聚匪黨結立南北兩會首匪陳翹萃陳顯猷等各招集千餘人製造長龍瀨跳等船裝載礮械在該縣沿海村莊打單劫掠道光二十三年及上年以來疊出擄殺多命抗官拒捕似此拜會肆劫大干法紀若不趕緊嚴辦必致釀成事端著徐廣縉葉名琛迅即派員密速查拏勿任一名漏網再本日常大瀆奏浙洋見有閩粵盜船游奕已飭水師會剿探明此次船內匪徒多係廣東新安縣人盜首姓布名阿北即係新安蠶戶各船均歸管領等語是新安一縣竟爲水陸盜藪儻按捕不速致會匪與洋盜勾結更恐滋蔓難圖徐廣縉等見在勦辦毗連廣西各匪其各屬水陸匪徒必應嚴飭捕拏淨盡毋得顧此

失彼是爲至要原摺並常大瀆奏片均著鈔給閱看將此由五百里諭令知之○浙江巡撫常大瀆奏已革廣西巡撫鄭祖琛在籍病故得旨鄭祖琛孤恩昧良可恨已極該犯在家身死太覺便宜○壬申諭內閣廣西自軍興以來調派各省弁兵募集壯勇爲時已閱一載屢次移營剿賊士卒等觸冒暑雨瘴癘辛勞跋涉夙夜馳驅朕旻念南疆日盼捷音速奏俾吾民得安衽席而從征將士亦得以早息疲勞見在逆匪竄聚永安正如釜底游魂暫偷視息賽尙阿出省親督各路官兵環攻會剿自不難剋日蕩平朕聞在營兵勇無不切齒同仇誓圖滅賊當此賊勢窮蹙士氣奮揚之際統兵大員等自當乘機鼓舞多方激勵諭以及早成功即可立膺升賞儻臨敵退縮亦必執法從事嚴明賞罰更足勵士氣而固軍心其帶兵員弁遇有保舉參劾尤須覈實平允庶人人知感知奮

定可迅奏膚功朕宵旰焦勞念逆匪一日不除吾民一日不靖  
尙阿見抵大營著將朕意剴切宣布自各路帶兵大員及行閒兵  
丁練勇人等咸使聞知從此掃蕩妖氛靖嚴疆而安黎庶朕實有  
厚望焉○癸酉諭內閣近日各城御史奏拏獲鄰境案犯懇將獲  
犯各員量加獎勵疊經降旨令刑部於定案時聲明請旨矣各城  
司坊等官捕盜是其專責既能弋獲鄰境重案自應量予鼓勵以  
獎微勞但恐該員等希圖甄敘專以緝拏鄰境匪犯爲事而於本  
任捕務轉多廢弛從前道光十三年曾奉 諭旨凡有拏獲鄰境  
要犯之員必確覈本任緝捕並無未獲之案方准酌請鼓勵仍於  
摺內隨案聲明儻將本任緝捕漏不敘入卽係違例保奏著該部  
概行議駁並將該御史議處 聖諭煌煌於微勞必錄之中仍遇  
隨事覈實之意近來各城保奏摺內閒有敘及該員前此緝捕案



件而於本任有無未獲之案並未詳細申敘似此有勸無懲於捕務仍無裨益嗣後各城御史均當恪遵前奉諭旨遇有奏請獎勵之案將該員本任緝捕並無未獲之案隨摺聲明毋得違例保奏致開冒濫之端至緝獲鄰境重犯既予議敘則本境疏防之員自應奏請議處方足以昭平允所有見在各城所奏拏獲鄰境人犯交部審訊各案卽著該部查明該員等本任有無未獲之案照例辦理並將疏防要犯應議各員一併飭查聲明具奏○准承德府屬墾種荒地升科○甲戌敕諭暹羅國嗣王鄭明據兩廣總督徐廣縉廣東巡撫葉名琛遞到該嗣王進香表文並慶賀等表文共五道鑒納誠悃增朕悲懷惟嗣王素沐先朝柔遠厚恩茲謹遣使航海來庭篤於恭順朕心深爲嘉納第以外藩使臣向無帶赴山陵叩謁之例上年越南國王阮福時遣使進香曾經敕諭

以孝和睿皇后梓宮已於三月內奉移山陵宣宗成皇帝梓宮亦擇於九月內奉移慕陵該使臣到京已在奉移之後不及恭薦令該國王不必遣使遠來其慶賀登極方物亦無庸呈遞今暹羅國嗣王遣使進香更在期年以後事同一例朕怙冒萬國於海徼藩封並無歧視所有該嗣王呈進儀物方物仍飭疆吏發交使臣齎回以免跋涉該嗣王其悉朕體恤至意益矢棐忱永承懋眷欽哉○乙亥諭內閣據戶部奏續撥豐北工需銀兩一摺並另片奏歸還動支銀款等語均依議行矣此次工程緊要業經該部如數撥給該督等卽當嚴飭辦工各員趕緊修築趁此冬令水落之時及早合龍俾被水災黎得安生業明年重運亦不致有貽誤尤當破除情面慎選妥員力爲撙節覈實辦理毋得徂於積習任聽庸劣工員濫援成案致滋浮冒草率等弊國家經費有常遇

此大工朕不惜數百萬帑金爲民禦災捍患該督等具有天良亦當於應賠各員勒限追繳以濟要需若請帑則必期如數追賠則視爲緩圖實心任事之大臣當不如是也懷之○丙子諭內閣御史王茂蔭奏請振興人才酌擬五條呈覽其請造就宗室八旗人才歷陳近來積習自係實在情形我朝人才蔚起宗室八旗文武謀略超越前代良由習尚淳樸不事浮華以清語騎射爲本務登進之途原不必盡由科甲蓋學爲有用之學斯才皆有用之才近來文風日盛畱心經濟者固不乏人第恐沾染時習以文章風雅自詡不思講求本務殊非崇實黜華之道疊經朕申諭諄諄我宗室及八旗大小臣工諒必咸喻朕意嗣後益當奮勉砥礪求爲有用之學以備國家腹心干城之選該管王大臣等尤當因才造就俾文事武備各盡其長毋負朕培養教誨之意○諭前因東南兩

河工次每有過往官員等干求資助業經降旨嚴禁茲聞各省鹽務衙門亦有出京官員往求資助試思鹽務銀兩國帑攸關豈容賄徇私情濫爲酬應必當一體申禁力挽頽風嗣後如有官員人等向各省鹽務衙門求助及投遞書函逗遛不去者卽著該督撫等嚴查參奏以除陋習而肅嵯政將此通諭知之○諭軍機大臣等戶部尙書孫瑞珍奏河海並運以裕庫儲一摺據稱從前海運著有成效請將來歲蘇州松江太倉三屬新漕照案改由海運計節省之項可補庫儲又另片奏檢查成案歷陳海運之可行等語著陸建瀛楊文定按照所奏各情體察該省地方見在情形明年漕運是否有宜變通之處務當豫爲籌畫悉心妥議迅速具奏原摺片均鈔給閱看將此諭令知之○修山東泇河運河二廳石埽各工從河東河道總督顏以燠請也○丁丑諭內閣各部院學習

行走人員行走年滿向由該堂官嚴定去取分別咨留近來各衙門報滿之員奏留者居多咨回吏部者甚少未免無所區別道光九年曾奉諭旨各部院堂官務將所屬賢否秉公查察於應留者准其奏留不應留者卽據實咨部不准姑容聖訓煌煌允宜遵守著通諭各部院堂官於學習行走人員務當留心察看如果當差勤慎始准保留儻有辦公疏懈或於該衙門不甚相宜者卽照例咨回吏部候選不得概行保留致滋浮濫其業經留部人員或始勤終怠亦著隨時淘汰毋稍瞻徇以副朕激敘官方至意○先是綏遠城將軍托明阿奏安設穆納山卡倫章程下理藩院議奏至是奏遵查烏喇特三公旗所屬穆納山產有木植向係官爲開採嗣因民人擾害蒙古部議封禁近有匪人結夥入山砍木運賣並有拒捕刃傷台吉等案應如所請安設卡倫六處每卡派官

一員兵十名以資防守從之○己卯諭內閣戶部奏飭催江南省例應入撥各款請分別定限清釐一摺各直省例應入撥銀兩向由戶部登記備撥自應趕緊造報以憑撥用乃經該部疊次奏催而江甯江蘇安徽各藩司延未造報之款自道光三年起至本年八月止竟至一千五十九款銀數至九百二十六萬餘兩之多此中款項卽有應行釐剔之處其實存在庫者爲數甚鉅豈容任意玩延致啟侵那之漸著兩江總督江蘇安徽各巡撫嚴飭各該藩司按照該部單開各款將道光三年至二十三年未報各款予限三年二十三年至二十七年未報各款予限一年二十八年至本年八月未報各款予限半年迅卽查清分款造報如再玩延逾限卽著據實嚴參○安徽巡撫蔣文慶奏臣前奉諭旨查拏匪徒魏水煙頭張大礮楊思華等卽經飭屬設法偵緝據壽州定遠等州

縣會同文武員弁將魏水煙頭拏獲兼獲匪黨十二名茲又緝獲要犯張大礮供認聚眾結捻並銃傷人命不諱臣均飭令解省併究一面先提原獲匪首程六麻孜等嚴訊是否河南捻匪喬建德一黨該犯堅稱素未認識質之餘匪亦無異詞見飭屬檢查本省滋事各案分別詳辦仍嚴拏楊思華等並其餘匪黨以絕根株報聞○辛巳諭內閣徐廣縉葉名琛奏堵剿廣西交界地方匪徒三獲勝仗一摺廣西南太一帶地方自殲斃巨匪顏品瑤之後夥匪尙多閏八月初八初九等日經提督陶煜文飭令遊擊蘇崇阿署遊擊玉山何萬興署守備饒永福署廉州府知府沈棟華督帶兵勇馳至新鋪村那陵地方奮力前進槍礮齊發該匪受創逃逸初十日進兵至那芹村潮州兵勇首先攻入各兵均奮勇直前將賊巢燒毀據探匪首王錫從業經槍斃此次會剿廣西交界地方匪

徒疊次獲勝該督仍當激勵兵勇分投堵剿務將著名要匪及各股餘匪悉數殲擒以期淨絕根株所有出力文武員弁兵勇著查明酌量保奏毋許冒濫陣亡兵勇照例議卹○諭軍機大臣等徐廣縉等奏堵剿廣西交界匪徒三獲勝仗一摺廣西南太一帶股匪竄擾兩粵交界地方經廣東文武督帶兵勇分路堵剿見雖連獲勝仗而餘匪尙多且廣西正在攻剿喫緊之際更恐四路分竄仍當嚴飭在事文武實力堵截痛加剿洗不分畛域以期淨絕根株逆匪凌十八前已疊受懲創見在踞險固守著卽督飭將弁趕緊兜拏毋得稍有疏懈致令免脫廣西調撥潮勇三千名業已起程刻下想已行抵軍營惟念大兵雲集所需兵餉尤關緊要朕心甚爲懸念除戶部指撥軍餉銀兩外著徐廣縉葉名琛仍遵前旨於正雜各款並閒款內有可通融協濟之項寬爲儲備並傳諭曾



維於關稅應解項內無論何款酌量豫備以濟要需將此由四百里諭令知之○是月准江西饒州吉安等幫緩交虧折米石緩直隸安州等二十七州縣水災雹災新舊額賦

冬十月癸未朔享太廟○甲申以恭送宣宗成皇帝聖容盛京供奉上詣東華門外彩棚聖容前行禮○乙酉江蘇巡撫楊文定奏考校官兵技藝並恭錄嘉慶二十二年上諭飭發各官廳敬謹懸挂令各將備隨時訓諭得旨嚴行整飭以挽澆漓隨時推誠開導庶可漸有起色汝恭錄上諭比之到任後循例出示裨益良多○丁亥諭軍機大臣等陸建瀛楊文定奏追剿洋匪盜首投誠等語山東洋面盜匪占駕官船南竄經該督等飭弁勇截拏嗣在浙江石浦探聞盜船由溫州三盤洋面駛往閩洋山嶼島停泊守備周鼐率同勇目方判等追剿盜首布興有呈請投降

並懇請呈繳船隻印信及槍礮等物該匪等挾黃富興之嫌輒敢  
占船搶印其目無法紀已可概見見在各路會剿呈請投誠未必  
非因被追窮蹙爲苟延旦夕之計著陸建瀛等卽飭鎮將將船礮  
印信先行押回仍飭密察情形儻稍有反覆卽併力剿捕擒穴擒  
渠毋令片帆逃逸斷不可因一時乞憐墮其奸計並著閩浙各督  
撫迅派水師將弁協力痛剿以期淨絕根株黃富興見行抵何處  
著查明具奏至廣東碣石都司印信平海把總鈐記係於何時被  
盜搶去著徐廣縉等迅飭查明據實奏聞將此由四百里各諭令  
知之○賽尙阿鄒鳴鶴奏粵西股匪以金田會匪最爲頑狡死黨  
累千盈萬固結甚堅不惟設謀用閒末由解散卽疊經撿斬芟薙  
之餘而所過地方尙有愚民陸續煽聚一經入會從逆輒皆瞽不  
畏死金田逆匪自稱太平天國確有歷次所獲犯供及僞衣僞印

可憑其匪首確係稱太平王惟該僞王究係韋政抑係洪秀泉供詞往往不一臣等各路密發偵探多有指爲洪秀泉者緣此會匪本由洪秀泉馮雲山煽惑韋政傾家起釁始推韋政爲首後仍推洪秀泉爲首而洪秀泉又一姓朱則向有此說但未聞有朱九濤之名屢獲犯供匪黨內未有其人亦未聞有平地王徐光王等名目麥二邱二嫂等股亦已於橫州貴縣等處剿滅至顏品瑤就戮後其弟顏三及餘黨經勞崇光會同德亮等疊加剿創芟夷過半餘黨逃往廣東欽靈所屬崎嶇長灘等處見在兩省合剿其中脅從大半解散有真心悔過而尙無兇惡情狀者紳耆力保酌量收團亞王山背一帶數十村莊見已一概廓清餘匪竄聚靈山地面那勤新鋪一帶揀派得力兵勇越境前往與東省兵勇合力會剿凡有路可通村墟及橫州永淳各隘口均飭集團守禦如此嚴密

布置不難悉就蕩平惟容縣梁二十大股本與何名利凌十八等股或離或合向於高廉梧鬱交界地方出入滋擾見在督臣徐廣縉出駐高州專辦凌十八等股疊經函稱勦捕獲勝當飭各屬於毗連地方嚴密堵截並派道員林士傳專駐梧鬱一帶協同助勦又據林士傳稟稱馳詣岑溪水汶地方查得何梁股匪竄至岑溪地界者俱由扶參竄往東鎮一帶距水汶地方百里而遙當飭兵壯嚴防至興業縣黃亞佐本與梁亞花爲一股今梁亞花股匪已爲署桂平縣李孟羣等率團撲散惟首匪未獲黃亞佐是否仍在股內當飭各該縣嚴密接查見計粵西各處零股數月以來業已掃除十之六七餘股自何梁凌逆及顏大餘黨外俱已敗殘惟有永安逆匪實爲兇惡大慙臣等殫竭心力務將此股及早殲平使各股敗殘之黨聞風潰散大軍與各路兵勇得以分投撥用餘股

較易翦除報聞又奏臣行抵陽朔先期飛札各營官兵分路向永安進攻四面接應九月初十日都統巴清德署提督劉長清總兵長瑞李能臣等督同將弁攻其北路將龍眼潭東山口及馬背嶺村等處礮臺賊集團官嶺一帶礮臺全行燒燬斃賊無算都統銜烏蘭泰帶同都司田學韜等攻其南路並飭秦定三慶福帶兵接應將石燕嶺銅盤村各匪用礮轟擊計前後殺賊四五百名十二日巴清德劉長清會同長瑞李能臣復率將弁兵勇由北路進攻分隊誘敵三次斃賊二百餘名烏蘭泰自初十日攻水竇後復於十二日攻其南路賊匪伏於寨內不敢出拒我兵槍礮齊發復斃賊二三十名十六十九等日南北兩路官兵疊次進攻斃賊甚眾見仍嚴催各軍更番疊戰力圖攻拔惟查各匪首分住水竇莫村等處並非蟻聚城內探得該匪有將輜重船隻順流竄入潞江之

信已飭令新募潮勇行抵梧州時遇有賊船卽行截擊並令劉繼祖馮玉衡等迅速追剿防其竄逸所有此次尤爲出力各員應先行懇請獎勵 上諭賽尙阿奏官兵燒毀水竇賊巢續經進兵情形各摺片據稱九月初十二等日南北兩路進剿獲勝並十六十九等日力籌進攻各情該逆匪雖未竄離永安而官兵仍未能攻入城中殲擒渠首見計所募潮勇必可到齊該大臣駐紮陽朔就近調度卽當分撥南北兩營四面圍市步步偪入將各處賊營迅籌攻毀該匪首旣探明分住各營並非蟻聚城內固當先圖克復城池爲擒穴擒渠之計俾在外各匪無可竄入負固抗拒尤當力防各匪首之在水竇莫村等處者分路逃竄務飭統兵將帥趁此圍剿喫緊之時將著名各匪首悉數殲擒毋任漏網該匪旣有將輜重船隻順流竄入濛江之信所有潮勇前赴梧州時是否已

於途次將該匪船截擊其沙囊塞水放船不能遠出之說恐係匪黨播散謠言懈我追兵或因我兵前截後追登岸他逸尤須密飭劉繼祖馮玉衡等刻刻嚴防切勿稍有疏虞墮其奸計其南太一路經勞崇光籌辦妥協然尙未埽除淨盡見在白山遊匪雖經剿散仍責成該藩司等設法搜捕將乃利中等犯按名弋獲其謝江甸一犯詭計奸謀尤當畱意並嚴查該犯藏匿何處卽行拏究以免煽惑向榮前因患病是否回省抑在陽朔軍營養病查明覆奏至前奏飭調之雲南都司施嘉祥是否卽係李能臣營內先經保升參將之員亦著遇便查奏將此由六百里諭令知之○賽尙阿奏進攻永安賊匪情形得旨目下軍務正當喫緊汝斷不可過於焦急若用心過度轉致成病是不能善副朕懷又奏近聞豐北漫口興築萬難措手漕運一節不可不先事區畫請飭籌議海運章

程以資接濟批近日孫瑞珍等亦有此奏已有寄諭矣覽卿所奏可謂體國之大臣○以攻勦永安賊匪獲勝復已革總兵官長瑞職餘獎敘有差○戊子諭內閣本年南河豐工漫口江蘇山東被水災民朕心實深繫念疊經降旨飭令各該督撫妥爲撫恤諒必仰體朕懷次第籌辦茲據給事中袁甲三奏請飭令江蘇山東各督撫設局收養勸諭各紳商捐貲助賑如捐有成數或自行設局經理者事竣之日迅速奏請優敘並於交界地方派員撫輯大工處所嚴行彈壓等語向來興辦大工首先撫恤災民並可以工代賑第恐該地方官辦理不善或有侵漁剋扣實惠不能及民其有情殷桑梓急公捐賑者又不能覈實請獎以昭激勸且於地方匪徒聚眾逞兇等案不能從嚴懲辦何以戢奸宄而安善良著江蘇山東各督撫並鄰省各地方官按照該給事中摺內所陳各就地



方情形詳細體察妥協籌辦其捐貲助賑紳民經該督撫奏請獎勵朕必立沛恩施以爲急公好義者勸見在豐北工次該督等已奏派總兵大員帶兵彈壓如有匪徒藉災滋事卽著嚴拏懲治地方官不能實心辦理致生事端並著從嚴參辦○諭軍機大臣等本日據戶部奏粵省軍需孔亟請准該省商民出貲助餉一摺從前辦理夷務粵東商民多有捐貲助餉之舉見在東西兩省軍務方殷均應寬爲籌備著徐廣縉葉名琛察看地方情形如有急公好義捐貲較多者不妨專摺奏請使朕破格施恩以昭激勸想該督等必能妥協辦理力求實濟不至稍滋流弊也原摺著鈔給閱看將此由四百里諭令知之○己丑諭內閣前因御史雷維翰奏湖南吏治廢弛請飭徹底查究當降旨交程喬采嚴密訪查茲據該督逐款查明覆奏前任湖南巡撫陸費瑤雖查無受賄徇私實

據惟該撫在任多年於地方事務未能整頓又辦理習教匪徒諸形寬縱實難辭咎陸費琬著交部議處前任湖南布政使萬貢珍辰沅道呂恩湛既據查無別項劣蹟業經革職著毋庸議知府銜前任桂陽直隸州知州俞昌會性近巧猾且以應行送部人員逗遛省垣私置產業殊屬不合著革去知府銜勒令休致卽飭回籍○諭程喬奏查拏首要重犯請寬免文武各員處分等語此案教匪左家發等句結多人潛謀不法於未經滋事之先卽將首要各犯訪獲多名按律懲辦程喬采督辦此案甚爲妥速著加恩交部議敘文武員弁應得處分及失察職名均著加恩免其議處仍將未獲各犯嚴密查拏無任一名漏網此等習教匪徒地方官如能於未經滋事之先迅速訪拏究辦弭患未然無論曾否藏匿及年月遠近歷任官應得處分原可酌量寬免若意存回護消弭不

肯實力訪拏該督撫仍當隨時查察嚴參懲處不得稍事姑容所  
有查拏審訊此案各員均屬著有微勞著該督擇其尤爲出力者  
酌量保奏候朕施恩毋許冒濫○諭陳慶偕陳世忠奏遵旨會議  
前赴閩粵追剿盜匪一摺登州鎮總兵陳世忠著卽迅速前赴福  
建交閩浙總督差委責成追捕山東洋面竄回盜匪務令悉數殲  
擒勿畱餘孽剿匪事竣卽回山東本任所有登州鎮總兵印務著  
陳慶偕派員署理○貴州巡撫喬用遷卒予祭葬○辛卯以蔣蔚  
遠爲貴州巡撫未到任前以布政使呂佺孫兼署嚴正基爲河南  
布政使由廣西右江道遷未到任前以南汝光道鄭敦謹署理○癸巳諭  
內閣徐廣縉葉名琛奏圍剿股匪大獲勝仗並將頭目殲斃一摺  
廣東何名科梁二十大股匪在信宜縣境滋擾經兵勇分路迎擊  
奪獲礮械多件並將頭目梁二十大立時槍斃賊勢已極困蹙仍

著嚴飭高州鎮道等激勵兵勇趁此聲威悉數掃蕩並將股首何名科嚴拏務獲勿任免脫其凌十八股匪見經該督帶兵圍剿並著迅速兜拏毋令竄逸○兩廣總督徐廣縉奏酌籌藩關兩庫各款銀三十萬畱備廣西軍需下部知之○甲午諭內閣阿靈阿奏遵查大祀王公百官隨從行禮一摺嗣後壇廟大祀朕飲福受胙及謝福胙時陪祀之王公百官有應由傳贊官傳贊隨從行禮之處俱著恪守舊章遵行如傳贊時有應行禮而不行禮者或傳贊遲誤卽著糾儀各衙門查明參奏○丁酉諭軍機大臣等薩迎阿奏番賊搶掠鎮羌等營地方及古婁等堡先後堵捕情形該鎮將等遷延畏葸或不發兵接應或帶兵前往已在賊匪遁逃之後種種貽誤殊屬可惡該省沿邊一帶近日番賊搶劫之案較前更多若非該處文武平日全無布置何以賊匪一經竄擾如入無

人之境舒興阿見已馳抵署任著將該省見在賊匪情形及薩迎阿如何督飭防捕之處查明據實奏聞舒興阿係特簡之人務期竭盡心力以副朕望將此諭令知之○諭賽尙阿奏遵查向榮巴清德尙無互相推諉等情並見在接仗情形一摺該匪竄踞永安我兵屢次進攻惟以抗拒不出爲苟延之計其窮蹙情形已可概見但我兵日久疲乏能出隊者僅五六千人即使潮勇到齊合計亦止八九千人果否足資調遣兵力不至單弱潮勇到齊之後該大臣務當嚴飭帶兵將官四面圍攻合力進剿嚴密布置謀定後動務將賊首韋政洪秀泉等設法誘擒不可任其竄逸破城之後僅有零星餘匪分竄他處亦應嚴密堵截勿畱餘孽逆匪占踞永安州城已兩月有餘添調兵勇又復數千軍需浩繁籌餉日形支絀朕日盼捷報宵旰難忘諒該大臣亦必萬分焦急總期籌畫萬

全一鼓蕩平以慰朕望向榮見在病體若何如已就痊卽飭令迅赴軍營勉力自效以贖前愆將此由六百里諭令知之○賽尙阿奏向榮巴清德接仗情形得旨看來巴清德亦軍營中必不可少之人著畱心查看如尙堪驅策則已若畱之無益則俟令伊少立寸功卽行奏聞候朕調回密之○戊戌追予浙江陣亡總兵官葛雲飛鄭國鴻原籍建祠○己亥諭軍機大臣等有人奏湖南省近來捕務廢弛陸路固多盜匪水路洞庭湖尤甚有白晝連劫一二次者有黑夜連劫二三次者事主因湖面遼闊不知屬何州縣管轄且無錢給與書差止得隱忍不報卽閒有事主報案地方官因湖面界限不分互相推諉且書差需索包庇終難弋獲又片奏湖北鄖陽安陸施南等府近來匪徒甚多與船戶勾結設計誘騙女孩遇便沿途販賣各等語盜賊滋擾最爲商旅之害洞庭湖在兩

省交界汪洋數百里最易藏奸著程喬采龔裕駱秉章嚴飭所屬無分畛域認真查拏如有州縣推諉及書差需索包庇等弊卽行從嚴懲辦至誘騙女孩肆行姦賣尤堪痛恨著程喬采龔裕一併飭屬嚴密訪拏按律懲辦以靖奸宄而安善良原摺片分別鈔給閱看將此各諭令知之○以吏治廢弛革前任湖南巡撫陸費瑤臧○庚子諭內閣廣西逆匪竄踞永安州城見在大兵進剿層層圍攻賽尙阿駐紮陽朔督辦所需軍餉業經戶部陸續撥解源源接濟蠢茲小醜已如釜底遊魂指日卽可一鼓蕩平擒渠掃穴惟念兵勇雲集需用浩繁必應寬爲儲備除見經戶部撥解外著再由內庫添撥帑銀一百萬兩作速解赴廣西大營備用朕睠懷南服宵旰難忘不惜疊發帑金數百萬兩爲吾民除害諒該大臣必能督飭文武紳民兵勇殄滅醜類迅奏膚功以副朕綏靖巖疆至

意○壬寅諭軍機大臣等前據薩迎阿審辦雍沙番子一案見派大學士軍機大臣會同刑部審訊所有甘肅監禁之番犯十四名著舒興阿督同藩司黃宗漢署臬司易棠慎選通曉番語之人親提覆訊該番子等平素有無爲匪及勾結野番夥同搶劫情事秉公定擬具奏薩迎阿前審此案是否辦理草率有無偏袒意見並伊子書紳如何干預公事曾否與隨員同坐問供佐領富克津太如何隨同審訊所覓通事幾人是何姓名見在何處其如何訊取供詞情形均著確切查明據實具奏毋稍含混將此諭令知之○調易棠署甘肅按察使由陝西調○癸卯陝甘總督裕泰卒予祭葬諡莊毅○寶授舒興阿陝甘總督○甲辰轉禧恩爲戶部左侍郎以麟魁爲戶部右侍郎由察哈爾副都統遷○貨盛京金州水師營弁兵巡洋口糧○乙巳諭內閣徐廣縉葉名琛奏追剿何名科股匪情形並



特參總兵參將各一摺據稱逆匪何名科自九月初九初十等日  
大受懲創以後該匪分竄廣西岑溪縣地方經遊擊劉開泰帶兵  
追剿沿途獲匪多名岑溪縣知縣張永鎰乃聽信壯丁彭肇昌恐  
嚇之言畏葸先退以致逆匪遁逃該壯丁彭肇昌並有得銀縱賊  
情事實堪痛恨張永鎰著革職拏問仍嚴飭緝拏彭肇昌到案治  
以通賊之罪廣東高州鎮總兵楊昌泗於剿辦逆匪何名科梁二  
十大兩股種種調度乖方增城營參將王學詩不能與遊擊劉開  
泰協力剿賊疊次逃避以致賊得乘間免脫實屬怯懦無恥楊昌  
泗著先行開缺交部嚴加議處王學詩著革職拏問從重治罪見  
在該逆何名科竄往北流縣地方著該督嚴飭兩省文武員弁合  
力兜拏勿令漏網另片奏圍剿逆匪凌十八先後斃匪數百名擒  
獲六十九名匪勢窮蹙見仍藏匿羅境困守不出該督務當激勵

將弁併力圍攻仍須設法誘擒並將附近賊巢一帶地方嚴密搜查斷其接濟以期迅速剿除毋致遷延時日○戊申諭軍機大臣等有人奏貴州省黃平施秉台拱清平丹江古州黎平思州鎮遠一帶苗匪聚劫前案未獲後案復出上年苗匪保禾計也結黨滋事雖經獲犯多名餘孽未淨該匪之弟高禾姪响立又復糾黨殺人嗣經獲匪六十餘名高禾等仍未就獲該匪愈肆鳴張燒殺姦搶之案不可枚舉該省官吏瞻顧處分置之不辦並該省學政翁同書所奏牛皮箐萬山廠等處盜匪及上年黃平州施秉縣盜匪搶劫重案均未獲犯嚴辦等語似此緝捕懈弛必致養癰貽患且該省與廣西壤地毗連尤恐互相勾引另生枝節著吳文鎔呂佺孫按照摺內所奏各情實力查拏務將著名各匪悉數擒獲按律懲辦毋稍諱飾寬縱原摺著鈔給閱看將此諭令知之○以恭送

宣宗成皇帝聖容至盛京供奉禮成予護從王大臣及執事官員議敘有差賞護送兵丁半月錢糧○庚戌諭內閣御史宗室英華奏請肅清蹕路一摺 壇 廟大典御路所經自宜嚴肅嗣後凡遇朕親行典禮自午門至大清門及蹕路經由處所著該管大臣等遵照定例嚴行查察毋得視爲具文如有閒雜人等不遵約束任意往來者卽著查拏懲辦總期一律肅清以崇體制○諭軍機大臣等前據戶部奏粵省軍需孔亟請准商民出貲助餉當降旨著徐廣縉葉名琛妥協辦理如有捐貲較多者准其專摺保奏並由戶部行知山西陝西等省一律遵辦茲有人奏道光二十三年山西省曾勸捐銀二百餘萬該地方官假公濟私藉端滋擾者甚多有因怨家捏指勒出重貲者有因私賄夤緣脫身事外者有因得優敘而索費始詳者有棍徒勾串假託者種種弊端不可勝

言等語國家經費有常一時緩急借資民力不惜破格施恩以爲好義急公者勸惟在各該省大吏督飭所屬開誠布公妥爲勸諭若如摺內所陳從前劣員藉端舞弊尙復成何事體且山西一省如此他省亦恐不免著廣東山西陝西各督撫於接到部文之後妥定章程明白曉諭務使上下相信不得假手吏胥並責成該管道府隨時稽察儻有不肖官吏從中漁利或辦理不善致生物議立即指明嚴參總期民不擾而事易集於軍國要需方有裨益原摺著鈔給閱看將此各諭令知之○辛亥直隸總督訥爾經額奏遵籌收養鄰省災民派委道府大員輪流巡查以期實惠均霑得旨認真妥爲辦理稽查弊端撫恤災黎嚴拏匪徒原可並行不悖直省附近京畿朕見聞所及若辦理不善徒使吏胥中飽朕必惟汝是問○貴州巡撫蔣霽遠以章奏失體奏陳感悚下忱得旨汝

既膺茲疆寄但事事畱心則可斷不准養尊處優事事委之於人  
○是月緩山東臨清等五十七州縣並德州等四衛水災風災雹  
災新舊額賦蠲雲南石屏等三州縣被旱民田額賦緩吉林三姓  
水災本年額賦湖北武昌等二十八州縣暨武昌武左等九衛被  
水村莊本年漕糧及新舊正雜額賦展八旗兵丁應扣借支銀免  
伊犁被水田畝本年額賦

東華續錄

咸豐十二

臣王先謙敬編

臣陶濬宣恭校

十一月壬子朔冬至祀天於園丘○賞八旗兵丁一月錢糧  
○安徽巡撫蔣文慶奏據該文武員弁稟稱拏獲匪犯魏水煙頭  
張大礮後復懸賞購緝訪明楊思華等切實下落密率兵勇兜緝  
先後將楊思華及綽號貓耳躲鷹弋獲續獲夥黨閔牛牧李長華  
李鴻組三名等語疊奉諭旨飭拏之犯見已按名就獲並先後授  
捕餘黨多名一併提省嚴訊確情盡法懲辦報聞○癸丑賽尙阿  
奏何名科股匪前由容縣北流竄來欲與永安會匪合夥疊經諄  
飭各營嚴防截剿茲據右江道楊彤如等稟報該匪於九月十六  
日由岑溪南鄉翻山竄至容縣經知縣韓彥章等率同壯練擒斬

七八十名十八日該匪竄往北流界復經知縣阮正惠等督率練丁會同各營官兵擊退該匪向鄧江涉水經兵練追擊溺斃擒斬甚多餘匪奔竄旋據署貴縣知縣張汝瀛稟稱該縣團練人等於二十七日在縣屬郭南里地方擒獲匪首何名科及大頭目何名怡梁十八李四暨夥黨多名此股匪徒業已蕩平 上諭內閣昨據徐廣縉葉名琛奏越境窮追擒獲首匪一摺逆匪何名科一股嘯聚數千人奔竄兩粵交界地方滋擾日久罪大惡極茲經廣東廣西兩省官兵練勇合力兜剿將首夥各匪悉數擒獲訊明正法餘匪翦除殆盡辦理甚屬可嘉其首先擒獲逆首者何人協力追剿購綫接應者何人著賽尙阿徐廣縉等會同確切查明據實保奏兩省出力文武各員並著賽尙阿徐廣縉等分別查明保奏務期覈實毋稍歧異見在竄踞永安州之洪秀泉等及羅境墟之凌

十八等均係著名會匪豈容日久逋逃該大臣暨該督等仍當激勵將士併力圍攻迅速殲除以慰朕望○諭徐廣縉葉名琛奏勦辦凌十八股匪先將吳三一股剪除一摺逆匪凌十八陳二吳三分作三股竄入羅境墟經升任高廉道宗元醇署肇慶府知府李敦業分飭弁兵前後迎擊將吳三一股全數殲滅逆匪三股已去其一賊勢愈孤兵心愈壯該督仍當嚴飭將弁趁此聲威趕緊圍攻羅境賊巢諒首匪凌十八等釜底遊魂不難指日掃蕩也○諭軍機大臣等賽尙阿奏連日進剿永安賊匪情形一摺賊匪久居永安雖經官兵疊次攻剿總未得手豈逆匪死黨固結我兵不免觀望耶抑調度接應設間用伏帶兵大員不能布置得宜耶烏蘭泰查出退走之兵六名卽於軍前正法行兵紀律爲要自應如此辦理嗣後臨陣如有先行退縮之弁兵著卽立時正法以肅軍令



該處調到之兵其疲乏及病弱者均經分別裁汰見在軍營存留  
兵丁得力者共有若干新募潮勇到營果皆驍勇善戰正可乘其  
銳氣隨同官兵剋期進剿切勿稍有挫衄再延時日老師糜餉咎  
將誰執向榮素尙勇敢見旣病痊何以仍令其閒處豈以官村挫  
敗之後竟不堪再用耶著該大臣酌量派委責令分帶兵勇勉力  
自效以贖前愆軍餉又發去內帑銀一百萬兩另由戶部撥解一  
百萬兩諒可源源接濟惟據稱軍營每月需銀七十餘萬兩值此  
國用支絀之時儻再耽延何以爲繼該大臣諒亦顧慮及此迅籌  
全局以慰宵旰焦思也另片所陳南太一帶各股匪剿辦情形並  
隆安縣歸德土州戕官各匪徒著飭令勞崇光會同鎮道等督率  
文武員弁兵勇分路剿除勿令餘燼復熾句結滋蔓將此由六百  
里諭令知之○予廣西陣亡知縣高延祉等祭葬世職○甲寅諭

內閣常大淸奏參防捕洋盜不力之總兵一摺浙江石浦及台州府所屬之甯海各洋面見有盜船往來游駛並有擄劫商船等案經該撫疊次咨催定海黃巖溫州三鎮總兵出洋追捕該鎮等事前既不豫爲防備及匪船竄回石浦等處擄劫訛索又不迅帶舟師跟蹤攻擊實屬遷延玩誤署定海鎮總兵提標右營遊擊周士法黃巖鎮總兵湯倫署溫州鎮總兵乍浦協副將池建功著一併交部議處仍責令戴罪堵拏以觀後效儻始終延玩卽著從嚴參辦○諭軍機大臣等據常大淸奏盜船竄回浙洋見籌會剿並各鎮防捕不力情形一摺另片奏江南勇首林龍義等駕船駛抵石浦帶領盜匪赴江南省投首等語盜首布興有呈請投首前據陸建瀛奏到時卽降旨令該督等密察情形防其反覆並著閩浙各督撫迅派水師將弁合力兜剿見尙未據該督等覆奏廣艇盜匪

膽敢於山東洋面搶占官船竄回閩浙洋面肆行擄劫必應嚴拏  
 懲辦該匪等如果實心悔罪投誠何以又在浙洋擄劫商船並於  
 海口索借水米似此詭詐兇頑之輩豈可遽信其必無反覆著各  
 督撫仍遵照前旨協力緝拏常大溜業已添雇水勇多帶礮械與  
 山東江南兵勇各船聯成大幫惟兵力尙恐不敷著裕瑞迅飭水  
 師提督鄭高祥統帶舟師趕緊赴浙會同勦辦石浦匪船是否業  
 經江南勇首帶領起碇開行其船礮果否呈繳前此投誠之說是  
 否係該匪等詭計苟延冀懈我師著陸建瀛等悉心訪察萬勿墮  
 其奸計見在各省如何辦理若稍遷延推諉必致釀成後患該督  
 撫等能當此重咎耶將此由四百里各諭令知之○乙卯命工部  
 尙書阿靈阿恭詣 昌西陵查看欽工料物○丁巳諭內閣朕本  
 日出神武門詣永安寺等處拈香悅心殿傳膳辦事惟值日之部

旗等衙門奏事甚屬寥寥其餘各衙門竟無一事陳奏豈本日並無應奏之事乎若因朕臨莅處所或有未便遂將應行陳奏事件改期呈遞名爲仰體實則自耽安逸殊失朕孜孜求治惟日不足之本意嗣後遇有臨幸傳膳地方非經傳旨推班日期各衙門均著照常奏事毋仍蹈因循之習致公事轉多曠誤將此通諭知之○己未諭內閣據載垣面奏此次恭送 聖容途次住宿食用均係自行豫備乃經過地方仍有豫備公館之處殊屬非是且恐地方官因欽使過境託名供應苛派民間致滋擾累嗣後凡遇特派王大臣赴盛京各項差使非奉旨馳驛者該地方官不准豫備公所及供應一切以期無累閭閻儻經此次申諭之後該地方官仍蹈積習卽著派出之王大臣據實參奏毋稍徇隱○庚申諭軍機大臣等前因查拏把持倉務之棍徒田承德等降旨令倉場侍郎

查訪各倉如有似此棍徒卽行嚴拏懲辦茲據慶祺朱嶠奏訪得各倉開放米石之先向有匪徒找向該倉花戶索要錢文名曰霑光錢該花戶定期於放米後或在廟宇或在茶坊酒肆散給錢文爲數甚多請飭查拏等語匪徒任意訛索於倉儲大有關係必應嚴拏究治惟慶祺等摺內未將姓名住址確切指明無憑躡緝且統稱各倉亦未將何倉係何人把持詳晰聲明該侍郎既有訪聞著卽將花戶等密傳查訊令其指出匪徒姓名迅速具奏以便飭拏嚴辦至該花戶等因舞弊受人挾制亦當查明送部究辦毋得含混但以一奏塞責也將此諭令知之○辛酉免湖北節年民欠各款銀○癸亥改吉林雙城堡協領爲雙城堡總管加副都統銜添設委協領一員○甲子諭內閣前派大學士軍機大臣會同刑部審訊番族一案經該大學士等將琦善供詞及續經解到之已

革藩臬道府等供先後呈覽並奏明該司道等供詞尙多歧異再行研訊等情朕復諭令舒興阿督同藩臬兩司覆訊監禁番犯取供具奏見在應訊之已革署知州趙桂芳等均已解到該革員等供詞與已革藩臬道府等供有無歧異並與通事等供是否相符仍著大學士軍機大臣會同刑部督飭章京司員等秉公審訊悉心研究孰是孰非務須質對明確毋得稍存成見致有不實不盡

○丙寅署江西巡撫王植奏江西界連楚粵南贛一帶每有匪徒結黨拜會肆行劫竊之事見經嚴切飭屬訪拏加意防範得旨仍應嚴密訪察不可一奏了事○丁卯諭軍機大臣等據常大瀆奏匪船仍在浙洋游駛山東勇船被圍見在親往督辦一摺覽奏憤懣已極據稱山東守備黃富興帶領勇船出洋匪船由金塘洋面駛來江南勇首方翔前赴匪船曉諭盜首布興有稱與黃富興挾

有深讎欲行報復是夜匪船十餘隻連踪駛至開礮向黃富興船上轟打兵船開礮攻擊匪船並未向兵船回礮黃富興船被匪圍住欲將該守備殺害經布興有力阻並向方翔告知投誠之意已決斷不將黃富興殺害見在石浦洋面聽候回示等語該匪等果與黃富興挾有宿讎何以不在江浙山東各督撫衙門具呈申訴乃敢占駕登州官船竄回浙洋肆行擄掠索借水米詭稱投誠已屬居心叵測復將黃富興勇船圍住牽駛不卽放回名爲投誠實則希圖挾制狡橫情形可恨之至該處兵船何以並不直前救護所云匪船不向兵船回礮是否藉詞掩飾抑係兵船坐視不救致令黃富興力竭被擄此等情形必當嚴查懲辦提督善祿何以一無調度水師將領平日並不訓練臨事退縮不前已可概見昨將湯倫池建功周士法等懲處令其戴罪自效若諉云風色不順何

以黃富興勇船尙能出洋匪船南北游奕自如獨三鎮兵船逗遛南洋未能追北又安用此等懦怯將領爲耶前據裕瑞奏飛咨鄭高祥統帶兵船赴浙此時計已可到陳世忠計亦馳赴閩浙聽候該督調遣葉常春所帶之船當先已到浙常大瀆見駐甯波卽與各該提鎮會商夾擊痛加剿洗見在該匪等如果將黃富興送回船礮呈繳卽著飭令鎮將押赴上海交陸建瀛察其情僞酌量辦理儻稍有反覆卽當督飭水師合力兜剿斷不可墮其奸計設或兵力不敷仍著江浙福建各督撫迅籌添派星馳赴援並飭蘇松太道添募水勇船隻助剿務期盡殲醜類以靖海疆將此由四百里各諭令知之○戊辰 上詣 大高殿祈雪○庚午諭內閣鄭鳴鶴奏遵旨將革職拏問各員嚴審定擬一摺廣西已革知縣王烈已革知府顧元凱於審辦馮雲山一案雖未有意寬縱惟於習



教結盟重情事前既毫無覺察迨經被控到案又不嚴查究辦實屬玩視要案僅予革職未足蔽辜王烈顧元凱均著照議從重發往軍臺效力贖罪已革巡檢王基訊無得賄釋放情事惟於該匪未經被控以前疏於查拏咎亦難辭業經革職著毋庸議另片奏顧元凱於革職奉旨畱營後見尙選派壯勇購綫捕賊著准其暫緩遣戍仍遵前旨畱於廣西軍營效力○辛未諭內閣見在南河豐北業已開工災民赴工力作餬口有資惟念時屆隆冬嗷鴻徧野以工代賑止能惠及壯丁其老弱婦女尤應加意撫恤朕眷念災區時座宵旰昨據陸建瀛奏豐沛銅碭等縣辦理賑務民情尙屬安帖其附近之邳州一帶因微山湖水漫淹該處紳民亦經捐貲助賑災黎不至失所但恐窮鄉僻壤未能周徧該督撫等仍當妥爲籌畫或分設粥廠或酌放錢文因地制宜毋稍遺漏至明春

青黃不接之時亦應及早設法勿致臨時周章儻地方官辦理不善或有侵漁剋扣等弊卽行查明嚴參其山東被災處所亦著遵照疊次諭旨實力奉行該督撫等其各勤恤民隱俾實惠均霑以慰朕念○諭賽尙阿等奏請飭催軍餉一摺前因廣西軍需緊要特發內庫帑銀一百萬兩並飭部籌撥廣東山西河南兩淮地丁鹽課各項銀一百萬兩迅解大營備用見在各該省諒已趕緊提款委員馳解其未經起解之款務須遵照指撥數目無論何款先行撥解統限於年內解到並著沿途各督撫飭屬於餉銀過境時小心護送並迅速催趲前進毋稍遲延貽誤○諭軍機大臣等寄諭兩江總督陸建瀛等據周天爵奏遵查豐工情形一摺朕詳加披閱自係實在情形此次豐北工程正值國帑支絀之時撥解銀兩卽一時未能到齊該督等自應酌量緩急設法通融不妨權宜

辦理其銀票一節應如何抵用之處亦可變通籌畫不必拘執總期有濟實用無誤要工見在購料興築大局已定正當乘時趕辦刈期蒞功若遲至桃汛將臨則春水方生更難措手該督等既知引咎自責卽當通籌全局爲朕分憂若徒藉口於帑項不齊以致貽誤則前愆未贖後患復滋誤國殃民又將誰諉耶至周天爵所稱撫恤饑民本日已明降諭旨該督等務當遵旨妥爲籌畫無令匪徒潤跡滋生事端又據片奏改錢賑爲粥賑酌截南漕以作賑需等語著該督等一併體察情形妥籌具奏周天爵摺片三件均著鈔給閱看將此諭令知之尋奏粥賑多有攙和轉易滋病不如散給錢文見賑捐款擬分六次散放計至明年三月爲止似可無須截漕報聞○諭前據常大滄奏布興有等匪船見將山東勇船圍住等情當諭令江南閩浙各督撫提鎮等迅速會剿並因該匪

曾有投誠之稟如果將黃富興送回船礮亦均呈繳卽著押赴上海交陸建瀛酌辦昨據陸建瀛奏稱見由常大溜就近查辦毋庸押回上海等語除盜以剿捕爲先間有盜勢窮蹙悔罪投誠因而准其自首者亦未始非相機設計權宜辦理之法此案前據陸建瀛奏守備周鼈帶勇追匪該匪遣小船迎降並據布興有呈遞稟帖懇請繳還印信船礮該督卽飛飭葉常春迅赴該島將該匪及呈繳等件押回上海聽候查辦朕以匪徒詭詐多端總當察其情僞仍一面飭催閩浙等省師船迅速會剿惟該匪投誠之說本由江南鎮弁據情稟報茲陸建瀛又以匪船本在浙洋應由浙江查辦恐辦理兩歧盜匪或乘間遠颺轉難措手陸建瀛向於海疆操縱事機頗有決斷此事豈可稍分畛域著卽與常大溜密商合辦仍嚴飭師船併力追剿儻該匪等窮蹙投誠卽可將計就計令將

船礮繳出並將黃富興送還再行奏明覈辦該督見在徐州僅因上海鞭長莫及屆期卽派明幹大員前往查辦斷不可稍存推諉致誤事機再前經諭令該督撫籌議海運未據奏到著陸建瀛楊文定常大瀄等察看情形迅速妥議具奏毋再遲延將此各諭令知之○前任鑲黃旗蒙古都統巴清德卒予祭葬諡果毅賞治喪銀三百兩○癸酉諭軍機大臣等寄諭閩浙總督季芝昌前有旨令陳世忠迅赴福建交該督差委責成追捕山東洋面竄回盜匪茲據陳世忠奏交卸啓程日期已明降諭旨著季芝昌酌派師船令其管帶矣見在盜匪在浙洋游駛山東勇船被圍已據裕瑞飛咨鄭高祥赴浙督剿或令自領一隊著該督詳加查訪陳世忠平日爲人是否奮勇於海洋剿匪事宜能否言行相符確有把握不至貽誤一併據實具奏將此諭令知之尋奏陳世忠人極爽直詢

以營務洋政亦甚明悉報聞○丙子賽尙阿奏自上月初三日南北各路會剿後烏蘭泰暗伏地雷轟斃二十餘賊嗣後潮勇陸續俱到十八日烏蘭泰派副將常祿等攻賊之南秦定三等在銅盤村一帶接應烏蘭泰開隆阿等攻賊之北副將巴圖在秀才橋埋伏已革遊擊劉文賢在北蕩村埋伏守備戴文蘭等率兵勇環攻誘敵先將放卡巡更賊殺斃四名其水寶村旁屯糧小營並大寶村一帶賊屋盡行燒燬其州城暨莫家村賊匪分股來襲我軍經巴圖劉文賢經文岱周鳳岐督兵環攻烏蘭泰回兵截擊該匪退奔石溝村水寶迪北賊匪亦經開隆阿督兵擊退計先後斃賊四百名東南路駐紮之許祥光張敬修馮玉衡各帶兵勇到古眉峽口用火箭燒賊望樓篷寮賊奔峽內對山賊匪亦被北勇擊斃二百餘人劉長清李能臣長瑞等分三路進逼紅廟賊匪鳴角開

破我兵攻擊多時斃賊數十人其東平嶺二股賊匪均被我兵擊退十一月初五初六等日烏蘭泰等復攻水寶焚燒賊巢接獲該匪鑄礮鍋具各路兵勇合力追殺先後斃賊五六百名再向榮病已就痊該員感激 聖恩亟思自效於初八日移營淳亭卽圖合力大舉 上諭內閣向榮病已痊愈既知感激朕恩力圖報效著賞給三品頂帶飭令迅速進剿以專責成見在南北各路疊獲勝仗新紮營盤距城漸近該匪勢已窮蹙著賽尙阿督飭文武盡力接捕勿任竄逸○諭軍機大臣等據賽尙阿奏兩次進剿獲勝情形所稱十月十八日永安以南官兵進攻及東南古眉一路均有勝仗而北路兵勇未能得力新到潮勇屢戰屢退是大局軍情並未得力諸逆且坐踞州城從容布置而我兵曠日持久尙無制勝之謀細察各路分布兵勇形勢尙未能層層逼進前剿後應且屢

爲該匪鐵打蒺藜梅花坑所阻是我兵旣難立腳何以賊匪出拒時仍復坦行無礙殊不可解其深溝固壘被攻兩月有餘何至如前完整得非乘我之懈時時修復營中散漫情形已可概見卽烏蘭泰督兵在州南攻剿雖屢有小勝未加懲創亦恐布局設間未臻嚴密官兵勢難再籌添調軍餉亦艱於多方轉運該大臣豈不知之向榮素有膽略身受重恩今復棄瑕錄用宜如何奮勉爭先出奇決勝卽烏蘭泰亦須檢齊軍實激勵兵心身先士卒毋徒博慎重之名轉蹈因循之習其從前疲敝之兵勇隨時酌量裁撤潮勇屢經揀調新到者豈皆精銳若不慎加選擇致有挫失或恐反受其累北路退縮之兵係何人管帶何人首先退走若不大加懲創何以申紀律而振軍威卽如趙如勝之不能用命徐大醇之擅離營盤該大臣均當確實查明懲一儆百勿再姑息養好其鎮將



中素有謀略奮勇出力者該大臣亦當量才任使各盡其長俾令迅速圖功毋相推諉前奏斷賊接濟是行軍要策該逆旣困守一城我兵又四面圍而何數月以來未見賊勢窮蹙必有好民接濟兼恐窺伺我軍餉道如貴縣劫餉等事更屬不成事體見在如何防護接遞如何嚴斷接濟如何分派攻剿如何購綫內應種種機宜有無把握賊營所設魚網暗溝令我兵俯仰均無所措而我兵所購毒草鏹水效驗毫無恐不免爲人所欺該大臣駐紮陽朔離永安一百餘里厯次稟報軍情是否確實應如何就近督察調度之處朕亦不爲遙制至賊情詭詐儻窮而思竄爲聲東擊西之計尤不可不豫爲準備前據奏賊目分踞城內城外各處近日是否仍前分踞抑已蟻聚一方於擒獲賊犯奸細時必應隨時訊明相機攻取不得再任竄逸更費周章該大臣於兵餉全局均應通籌

併計固不可孟浪從事亦不可遷延失時也懷之慎之將此由六  
百里諭令知之○賽尙阿奏南邕顏品瑤餘黨負隅死守連日攻  
擊尙未得手降補都司趙如勝管帶兵勇難期得力得旨趙如勝  
因何又不出力著查明具奏不可因奉旨派往廣西稍涉遷就也  
又奏湖南都司徐文醇擅離營盤請革職畱營效力以示懲儆批  
徐大醇此次如實有退縮情形或以後仍不出力著卽行正法○  
丁丑允戶部奏飭催廣東未完借墊銀兩○戊寅諭內閣通政使  
羅惇衍奏請崇儉禁奢一摺國家承平日久生物繁滋官民競尙  
奢華於風俗人心大有關係必當申明舊制以復淳風道光年間  
曾奉 諭旨飭令內外各衙門將民間應用服色及昏喪儀制悉  
照會典所載刊刻簡明規條使百姓知所恪守乃近來奢靡之風  
未能盡革總因有司奉行不力視爲具文規條久不頒行鄉曲無

由曉諭俗吏積習相沿轉以條教爲迂談以化導爲末務將所謂上行下效者安在耶著禮部查照道光八年頒行簡明條規通行內外各衙門遵照刊刻出示徧行曉諭俾民間知所遵循漸歸淳樸以副朕崇儉黜奢至意將此通諭知之○己卯以勦平廣東英德等處賊匪賞巡撫葉名琛太子少保總兵官崑壽巴圖魯名號餘升敘有差○是月緩江蘇豐利等十七場竈地水災新舊額賦並給豐利等四場竈戶口糧緩安徽鳳陽宿等三十四州縣被水被旱新舊額賦並給鳳陽宿等六州縣災民一月口糧蠲山東濟甯等六州縣及濟甯等二衛水災新舊額賦並給災民口糧房屋修費展河南永城睢州等十四州縣水災雹災新舊額賦蠲緩湖南武陵澧等九州縣暨岳州衛水災新舊額賦並貸安鄉農民麥種銀緩甘肅皋蘭等十四州縣暨隴西縣丞所屬水災雪災旱災

未完新舊銀糧草束免直隸安州等六州縣被水邨莊本年額賦並展節年應徵糧租免廣西臨桂等五十四州縣暨萬承等三十二州土司被賊災區上年未完額賦命撫恤廣西桂平平南等十九應州縣並所屬土司被擾災民

十二月癸未諭內閣御史周有誥奏嚴杜奸販接濟以靖洋匪等語見在廣艇盜匪於山東閩浙等省洋面游駛肆行搶劫總由各省水師訓練不嚴緝拏不力所致至內地粟米硝磺等物不准出洋例禁綦嚴若如所奏沿海奸徒希圖重價暗中接濟地方官何以毫無稽察任令洋匪游駛自如無所顧忌尙復成何事體著沿海各督撫嚴飭所屬遇有奸民偷販粟米硝磺等物出洋立即訪拏嚴行究辦務須實力整飭不准稍有偷漏儻地方文武查禁不嚴致有吏役兵丁勾串包庇等弊卽著該督撫等從嚴參辦以杜

奸萌而清盜源將此通諭知之○甲申諭內閣善祿奏疏防洋匪

自請議處一摺山東守備黃富興在浙洋失事該提督不能先事

防護咎實難辭善祿交部議處○以沈兆霖爲內閣學士

由詹事遷

○撥浙江搭運漕米濟放乍匠月糧○乙酉免湖北道光二十九

年以前未完額賦兩淮通泰海三分司所屬竈地未完額賦○丙

戌諭內閣奕興奏蒸查陵山樹株酌擬章程開單呈覽另片奏

三陵辦理章程均擬畫一等語朕詳加披閱如紅椿以內稽查

樹株酌分界限明定賞罰查山防禦輪替更換並陵山樹株造

冊存案分別應存應除嚴密抽查其青椿禁地劃分界限以專責

成並添設卡房酌派兵丁守護所議均屬周妥嗣後每年查驗樹

株著該將軍恭詣福陵昭陵興京城守尉恭詣永陵敬謹

查看仍由該將軍遴派協領等官會同該總管等監視伐除如有

含混影射等弊將監視各員一併參處至 永陵前煙筒山樹株並著責成興京城守尉興京廳通判常川稽查以昭慎重該將軍務當嚴飭該管各官遵照見定章程覈實查辦毋致日久視爲具文○諭陸建瀛楊文定奏遵旨籌議海運一摺前據尙書孫瑞珍奏陳從前海運成效請將新漕按照辦理並據御史張祥晉奏請推廣成案試辦海運疊經降旨諭令陸建瀛等體察情形悉心妥議具奏茲據該督撫籌覈大概情形先行覆奏所有來年蘇州松江常州鎮江太倉五府州漕白糧米著准其一律改由海運該督撫卽查照成案迅將籌辦章程詳議奏聞並著嚴飭各屬覈實認真辦理毋致滋生弊端○諭軍機大臣等陸建瀛奏接據總兵葉常春來稟盜匪布興有遣其弟布良大等赴該總兵船上哀懇投首情願呈繳船礮該總兵卽邀請常大溜到船親見該匪等跪地

哀求毫無異說等語匪徒詭詐多端難保不因我師四面夾擊窮蹙無路詭詞投首以爲緩攻脫逃之計前經諭令該督與常大澣密商合辦無分畛域著卽相度機宜察其真僞如果該匪等實係畏罪投首原不妨網開一面准予自新令將船礮全行繳出查明驗收酌覈情形奏明辦理儻稍有反覆仍卽嚴飭各路水師合力進剿務期力淨根株不可墮其奸計又據陸建瀛楊以增覆奏豐工情形及單開見辦工賑章程該督等卽當督飭在事人員妥速辦理剋期蒞功以慰朕念將此由四百里諭令知之○丁亥 上詣 大高殿祈雪○諭軍機大臣等本日據戶部奏酌改鹽務章程一摺已明降諭旨派王慶雲聯英馳驛前往山西查辦矣該藩司接奉此旨無論行抵何處卽行折赴山西俟王慶雲到時會同兆那蘇圖悉心體察該省鹽務情形妥爲籌辦聯英前在山東兩

准辦理鹽務如屬員中有通曉鹽務情形之人准其奏明酌帶一二員前往並著准其馳驛戶部摺已鈔給王慶雲矣將此諭令知之○陝甘總督舒興阿奏報謝恩得旨以實心辦公事以慰朕望永安城一事妥爲經理不可張皇蒙古固宜體恤然不可受其欺蒙總之操縱在我毋遽認其哀告爲真也密之又奏籌辦番務情形批妥籌辦理緣營積習廢弛粉飾將不能馭兵兵不能畏將汝之辦法尙屬簡易可行第條款愈多俾黠者益得滋其欺僞老實者無所適從惟有明定賞罰懲勸兼施責成各該員弁等毋得稍存觀望推諉之心寬其既往觀其後效兩省將領中可用者固不乏人識之欲真任之貴當舒興阿係朕特簡之人初任封疆固應虛心博採眾志成城然斷不可竟聽人言茫無主見天下事被剛愎之人決裂者尙少惟被委靡拘迂者廢墮實多汝可仿琦善之



嚴而去其偏苛薩迎阿年衰昏憤不足資也○命戶部左侍郎王慶雲江蘇布政使聯英馳往山西查辦事件○庚寅四川總督徐澤醇奏遵查峩嵎山並無教匪總目萬雲龍其人及忠義堂名號得旨仍應嚴密訪緝勿稍鬆懈○辛卯湖南巡撫駱秉章奏遵查洞庭湖盜匪飭屬實力查拏得旨認真辦理不可一奏了事緝察奸宄宜尙嚴勿稍寬○壬辰除湖南沅江縣被淹草地額賦○乙未工部尙書王廣蔭卒予祭葬諡文慎○以翁心存爲工部尙書調何桂清爲戶部右侍郎以杜翻爲兵部右侍郎由內閣學士遷○丁酉上再詣大高殿祈雪○戊戌寶尙阿奏大兵勦捕永安逆匪自十一月初六日烏蘭泰等獲勝後向榮於十五日移營上壘橫嶺等處該逆乘我兵營壘未定三路出撲向榮率同鎮將官兵奮勇擊斃賊無數總兵長瑞督飭新舊潮勇直趨龍眼塘該逆埋

伏齊起鑿戰逾時我軍開放連環鳥槍賊眾紛紛倒地全夥退去十七日該匪三四百人從西礮臺直上龍眼塘後山城外亦有五六百賊遙爲聲援我軍伏兵齊起立將河邊之賊擊敗黃鶴飛李孟羣之勇從旁趕截賊卽散逃兵勇追過河邊始還二十日我軍進紮龍眼塘衝口該逆千餘人直撲新營伏兵左右衝出槍礮齊施擊斃賊匪多名賊卽敗走二十二日該逆傾巢而出約四千餘人分三股蠡擁而來一撲龍眼塘大營一搶龍眼塘山梁一衝二洞口新營其搶龍眼塘山梁之賊被董光甲馬龍等分兩翼包鈔當將此股賊眾擊退其撲龍眼塘大營之賊尤爲凶狠向榮先戒嚴陣勿動俟賊近營盤數十步內我軍伏兵盡起槍礮齊施擊斃賊匪甚多該逆且闕且走退至河邊死拒不去向榮親率劉長清等張左右兩翼鈔至河邊我兵爭先過河欲包賊後該逆始行潰

逃其衝二洞口新營之賊因黃鶴飛李孟羣之勇正在築營該逆意欲攻我不備向榮先令該勇一半築營一半出敵該逆三次衝來俱被擊敗烏蘭泰探知向榮於二十一日進紮龍眼塘卽於黎明帶勇逼近賊巢以分賊勢正與賊遇我軍分路截擊斃匪無數二十二日烏蘭泰復督兵出隊攻打莫家村賊巢該逆傾巢出關被我兵擊敗三次追殺殆盡臣當以南北兩軍雖經連獲勝仗而該逆負隅拒守總未攻克州城必須各路會攻方可制其死命因定二十四日辰時密傳各軍屆期齊進是日向榮由北路進兵連敗紅廟及舊縣東礮臺之賊追至土城共斃賊二百餘名南路烏蘭泰亦於是日辰刻進兵五戰皆勝亦斃賊二百餘名又許祥光張敬修於二十三四五等日由東路古帶衝口一帶進兵行近永安州城之大誥嶺該逆向前抗拒有手執黃旗騎馬賊二名率賊

前來我軍四面圍裹槍礮環擊斃賊百餘名生擒賊目二名餘匪紛逃卽將附近賊屋二十餘間放火焚燒提訊二賊據供一名韋亞晚係韋政之姪一名澧仲時訊明正法二十六日烏蘭泰於獨松嶺開濠連紮四營二十七日復約許祥光等進攻水竇該匪屢出拒敵均爲我兵擊敗前後殺賊共一二千名自此次連日痛剿賊匪不敢復出見擬各營進逼直擣州城總期一鼓蕩平 上諭

軍機大臣等贊尙阿奏進剿永安逆匪連獲勝仗一摺向榮自統帶北路各兵以來與諸鎮將同心協力南路烏蘭泰督兵夾擊與東路許祥光張敬修等爲犄角之勢十一月二十日以後各仗頗爲得手正與前次奪獲雙髻山風門坳等仗聲勢相符向榮先經賞給三品頂帶茲又開復原官正宜感激愧勵乘勝迅剿烏蘭泰親督南路各兵勇亦復旁無牽制兩路移營進紮漸逼州城自不

難剋期攻克其城外水竇各處賊寨亦須同時進攻勿令匪黨互相救援致有竄逸該大臣卽飭烏蘭泰向榮督率將弁兵勇合力圍攻趁此連勝之時人人踊躍用命迅奏膚功同膺懋賞向榮一介武夫朕屢次施恩不爲不厚若再不知感奮良心何在細閱所奏二十四日以後布置一切不甚得力卽如前此雙髻山風門坳之捷彼時若能合力進攻防堵周密何至新墟餘燄過而復張以後如不能迅速攻剿徒延時日朕惟饗尙阿是問若或防堵不周致賊匪潰竄再擾他處或城已攻破諸將不和爭功忌能致逆燄復張朕惟烏蘭泰向榮是問其能當此重咎耶將此由六百里諭知饗尙阿並傳諭烏蘭泰向榮知之○以攻剿永安獲勝復向榮提督賞還花翎○庚子諭內閣廣西逆匪竄踞永安州城數日以來官兵四面攻圍尙未克復朕心實深焦盼昨據饗尙阿奏見在

南北兩路移營進逼疊獲勝仗葢爾孤城自不難指日攻克行軍之道賞罰爲先朕已疊申訓誡並於賽尙阿出京時頒給軍營備賞各件又特賜用遏必隆刀期於信賞必罰以振軍威而作士氣當此大兵合剿賊匪窮蹙之時尤當號令嚴明俾我將士知感知畏併力爭先庶克一鼓殲擒膚功迅奏賽尙阿見駐陽朔統率諸軍晝夜籌辦與朕同此焦勞著再傳旨諭知在事文武員弁兵壯人等務各齊心協力奮勉圖功乘此屢勝軍威機不可失斷不得稍形疏懈令逆匪日久稽誅其出力將士果有奮勇超羣者除由該大臣據實保奏外卽將前頒賞件傳旨賞給以示褒榮其有臨陣退縮不能用命或守禦不嚴致賊竄逸貽誤事機者該大臣卽用朕所賜遏必隆刀立正典刑以肅軍紀毋稍姑息總期賞罰公允迅掃妖氛以慰朕望勉之懍之○湖廣總督程番采奏年終密

陳文武大員切實考語得旨卿畱心吏治考語無絲毫不實不盡之處洵屬可嘉朕用卿封疆重任原欲代朕治人俾下情得以上達方不負古大臣之風卿若能永保茲念不惟渥承恩眷亦可格上天之佑護也又批閱單開有大臣干預公事者著隨時察訪有確據卽行奏參密考摺單汝旣手繕甚好嗣後寫行書亦可○辛丑諭內閣戶部奏籌議節用各款一摺理財之道不外開源節流二端而節財之流尤爲濟時要務如能實力經理必可行之無弊該部將見在應節各條分晰具奏朕詳加披閱如嚴覈上下兩忙分別藩司功過以專責成各省存贖款項按年抵撥以免牽混驛站餘贖銀兩提存司庫以備封儲嚴查交代以杜新虧等語皆係就國家自有之財爲覈實經久之計著卽照所議辦理該部卽會同吏部將上下忙全完未完省分各藩司應如何分別議處議

敘之處妥議章程通行遵照至八旗甲米仍復舊章全放本色段  
正庫見存物料分別應抵應停自係酌劑盈虛之道該部仍隨時  
察看妥籌辦理其酌減營馬一條所陳積弊亦係實在情形除該  
部所議京營及北五省駐防毋庸裁減外其餘各省著該將軍督  
撫副都統提鎮查照部議裁改分數妥議具奏由兵部會同戶部  
覆覈奏請施行總期帑餉不致虛糜撙節均歸實用以慎出納而  
裕度支○諭工部錢法堂奏遵將發下小錢嚴查覆奏一摺鼓鑄  
制錢向有定式豈容偷工減料致多攙雜此次發下小錢是否局  
鑪私鑄見既無憑確查姑免深究嗣後該侍郎等驗錢時挑出不  
合式樣小錢概令回鑪重鑄毋許仍前搭放料錢以除積弊並著  
嚴飭該監督等隨時稽察有犯必懲如有扶同諱飾經該侍郎等  
查出除將舞弊之鑪頭工匠交刑部治罪外並將該監督嚴參懲



處其每日解交部庫錢文著陝西道御史認真抽查如有攙雜小錢將該侍郎等一併參處毋稍徇隱至戶局事同一律亦著該部侍郎等飭令監督嚴加釐剔並著稽查之御史一體抽查務各實力整頓以肅園法而清弊端○諭軍機大臣等寄諭欽差大臣賽尚阿等有人奏前任博白縣知縣游長齡及該縣紳士朱德璉虛冒軍功游長齡前經捏報殲斃賊匪劉九又賊首劉八先充游長齡轎頭本年春間曾用愚弟帖告知該縣稱素有交情斷不進城沙河之戰捏報招集團練六千松山及秤鉤灣之戰並無殺賊之事又屢次打仗皆係黃錦泗帶勇並非朱德璉督戰賊匪擁眾至朱德璉家該紳士託人說和將黃錦泗獻出始行解去又賊匪吳晚一股曾至該紳士家將親丁二人捉出鎖勒索贖春間朱德璉帶勇協攻徐亞二一股爲賊所擄拘禁三日始得放還又廣東拏

獲吳晚時搜出印票一張係游長齡發給收執有沿途驗放毋庸查拏字樣各等情用兵之道必當賞罰嚴明豈容稍有虛冒捏飾若如所奏游長齡朱德璉各種情狀雖係得自風聞不可不認真查覈以杜冒濫此外軍營人員有無似此欺冒等弊一律查明辦理該大臣等務須秉公覈實查辦慎勿各存成見轉致受人欺蒙也原摺著鈔給閱看將此各諭令知之○壬寅淮湖南漕船分限扣交應攤剝價銀○癸卯 上復詣 大高殿祈雪○甲辰諭內閣前據禮部奏江蘇舉人安徽黟縣訓導朱駿聲呈遞說文通訓定聲一書當交南書房翰林詳加閱看進呈朕幾餘披覽引證尙爲賅洽頗於小學有裨朱駿聲著賞加國子監博士銜以爲畱心經訓者勸○乙巳諭內閣徐廣縉葉名琛奏勦辦廉州賊匪屢獲勝仗一摺廣東廉州與廣西交界處所自顏品瑤等匪經官兵擊

敗後其餘股向在兩省交界之新鋪那芹等處分踞險要拒守不出自九月以來兵勇會合進剿屢次獲勝復經該督等添派弁兵攜帶大礮擡槍於十一月初三十二等日由提督陶煜文督率進攻轟倒礮樓一座打毀木柵牆垣節次分攻賊巢迭有殲擒此數股匪徒負隅困守勢已窮蹙仍著該督等嚴飭在事文武員弁會督兩省兵勇迅速剿除勿畱餘孽其羅定州之凌十八股匪並著督飭官兵剋期掃蕩毋再遷延○以剿捕廣東瓊州洋盜肅清賞總兵官吳元猷花翎餘升敘有差○丁未撥山東司庫銀十五萬兩備賑○己酉諭內閣理藩院奏科爾沁札薩克多羅郡王僧格林沁率領本旗台吉阿勒巴圖等謝恩並具呈陳奏該旗昌圖農民吳保泰等抗不交租惑眾斂錢請特派大員率領官兵查辦所需銀兩情願由伊應得地租銀兩內照數備撥以補庫款等語上

年僧格林沁因該旗昌圖農民吳保泰等抗不交租請特派大員帶領官兵查辦係本地方應辦之事茲據僧格林沁呈請願將此項兵丁需費由伊應得地租銀內照數備撥彌補庫款感戴實出至誠惟念蒙古等生齒日繁自必賴此度日若由此項租銀彌補兵費伊等生計未免拮据所有兵丁需費銀兩加恩著毋庸僧格林沁彌補用示朕軫念蒙古世僕之至意○諭陸建瀛常大瀄先後奏廣艇盜匪畏罪投誠出自實心其未卽呈繳船礮及在浙洋圍困守備黃富興均因盜匪陳成發恃係各船總管從中阻撓指使眾夥搶占滋事見將陳成發砍傷捆縛交出並將黃富興送回繳出山東師船勇船共二十一隻水勇二百餘名商船船戶水手一百八十餘名並被擄難民全數送出大小鐵礮共三百餘位及器械等件一併呈繳向來辦理盜匪間有實心悔罪繳械投首亦

姑網開一面以示法外之仁此次廣艇盜匪布興有等業經該撫等察其投首出自實心其從中阻撓之陳成發見已戮首示眾所有該匪等六百二十四名著著加恩一概免其治罪其懇請遞回原籍之陳亞福五百六十餘名著責成署定海鎮總兵周士法黃巖鎮總兵湯倫署溫州鎮總兵池建功分起由海道解回廣東交各該地方官嚴行管束仍行令福建廣東各水師提鎮逐程接解毋許沿途逗遛其見在浙江之布興有等五十餘名著著常大瀄委員解回廣東交徐廣縉分撥各營酌量安插令其戴罪自效儻不遵管束卽著從嚴懲辦斷難再事姑容山東守備黃富興出洋追匪輕進失事咎有應得姑念所帶兵勇不多著從寬摘去頂帶責令管帶山東船礮仍回該省交陳慶偕差遣以觀後效其餘繳出盜船並礮械等件卽著分配浙江水師各營管帶各省師船勇船卽

行撤回○諭軍機大臣等此次投首陳亞福等五百六十餘名業已解回廣東交地方官嚴加管束其中有浙江福建人二名是否亦交原籍管束其布興有等五十五名交徐廣縉等分別安插據冊開各犯多係籍隸廣東該督仍當嚴加防範毋令再滋事端至此輩在洋日久熟悉風濤如閩浙江蘇水師各營中有可安插之處著陸建瀛季芝昌常大滄等酌留分撥各營令其效力亦可備捕盜之用如仍獷悍難馴不安本分即行分別照例懲辦斷不可稍事姑容勇頭方翔帶領布興有等投誠尙屬出力著陸建瀛酌量給獎至浙省洋面匪船游駛沿海奸民勾串接濟尙未能盡絕根株著季芝昌常大滄嚴飭所屬文武實力搜拏盡法懲辦其水師鎮將等官前因遷延懲處卽責令在於沿海各口所轄洋面認真搜捕將通盜匪犯盡數獲解或可稍贖前愆儻有盜船行劫之

案卽著從嚴參辦陳世忠見已調任溫州鎮總兵所有山東船礮卽交黃富興押送迅回登州或再須添派水師員弁幫同管押之處著常大漙酌量辦理將此由四百里各諭令知之○庚戌祫祭

太廟○是月緩江西南昌等十三縣被水邨莊新舊正雜額賦浙江海甯等二十八州縣被潮風旱田地新舊額賦江蘇上元江甯等五十五廳州縣暨蘇州等六衛被水歉區新舊額賦賑銅山等四州縣並徐州衛災民蠲緩安徽宿靈壁等二十州縣水災旱災本年額賦緩山東濟甯等四十七州縣暨德州等四衛被水邨莊次年正雜額賦並緩買各屬動缺倉穀賑湖北漢川被水災民豁免湖南鳳凰等七廳縣積欠租穀展緩河南武陟縣應繳修隄銀雲南白鹽井竈戶應繳撫恤修費銀貸湖北公安等五縣修隄銀○是歲朝鮮琉球入貢○會計天下民穀數除江蘇湖南湖北

未經冊報外直隸等省通其木小男婦四萬三千二百十六萬四千四十七名口存倉米穀二千七百一十一萬一千五百二石三斗七升四合六勺